

雲石集
六

應製文
祭文
上樑文
箋文
碑銘
墓碣

共十

~ 16
2351
6



2351
10-6

雲石遺稿卷之十一目錄



應製文

翼宗大王追上諡號玉冊文

大王大妃殿加上尊號玉冊文

大王大妃殿加上尊號玉冊文

孝顯王后金氏冊 王妃教命文

憲宗大王冊 世孫頒教文

純宗大王 翼宗大王祔 太廟頒教文

大王大妃殿加上尊號 王大妃殿上尊號頒教

文

孝顯王后冊 王妃頒教文

大王大妃殿寶齡五旬稱慶頒教文

大王大妃殿加上尊號 大殿進箋文

王大妃殿上尊號 大殿進箋文

大王大妃殿寶齡五旬 大殿進箋文

大王大妃殿加上尊號陳賀 大殿親上致詞

王大妃殿上尊號陳賀 大殿親上致詞

大王大妃殿寶齡五旬陳賀 大殿親上致詞

徽慶園 親祭文

延慶墓 親奠爵文

懿陵 親祭文

宗廟冬享 親祭文

孝成殿誕辰酌獻禮 親祭文

孝和殿誕辰酌獻禮 親祭文

孝和殿冬享 親祭文

孝成殿酌獻禮 親祭文

孝和殿酌獻禮 親祭文

宗廟春享兼祔 純宗 翼宗兩朝祭文

太祖大王御真奉安光明殿酌獻禮 親祭文

永禧殿酌獻禮 親祭文

玄巖書院賜額文

徐參判 英輔 賜祭文

濟州漢拏山厲祭文

斥邪綸音

箋文

謝 實錄洗草宴宣醞箋文

進 國朝寶鑑續編箋文

上樑文

興政堂重建上樑文

通明殿重建上樑文

南長寺大省樓上樑文

三嘉縣鄉校移建上樑文

玉笛山房上樑文

雲石遺稿卷之十一

應製文

翼宗大王追上諡號玉冊文

伏以纘先統而增愴禮重立孫奉顯冊而追徽孝大
 嚴父昭穆攸序神人允諧恭惟 孝明世子仁孝溫
 良之姿聰明英達之度齋 睿誠於文寢武飯展也
 百行之源懋聖工於舜哲堯欽卓矣三古之志處涓
 燕而玩理不越乎洙泗洛閩之書象雲漢而成章皆
 合於風雅典謨之旨 春宮毓德垂二十年甲觀篤
 休啓億萬世逮夫幾務之代揔益驗功用之發揮猗



丁酉遵志之批乙未飾喜之儀適追 列聖朝成憲
若九經治國之要四勿修身之本誕承 前寧人弘
猷玉牒頌功隆 兩殿之鴻號圭鬯攝事肅 七廟
之駿奔屹王基之豐碑漆沮源遠峙 皇壇之寶錄
江漢流長揭義理則嚴霜雪之威徠諫諍則恢山藪
之量恩綸傾帑庾之蓄北滂南饑剡牘列草萊之材
里舉鄉選沛然江河若決而無一事或敢自專至于
日昃不遑而暨百度罔有靡舉時則漢山東父老思
見德化之成譬如夏天下謳歐咸曰吾君之子噫蒼
生之寡祿遽黃離之遭災惟 皇祖繼體之哀矜

宗社而何及伊小子失怙之慟徹昊壤而莫攀肆於
曆服丕承之辰合有位號崇報之典 東朝之徽教
渙發卽我 真廟躋廟之規中庸之聖訓昭垂亦古
太王追王之禮皇天克昌厥後禰享莫尊大德必得
其名神理無憾節壹爲諡俟百有辭乃武乃文極其
大而敦化曰仁曰懿咸以正而顯謨矧二字之易名
寔 先朝之賜獎琬琰闡摸天之美縱云情禮之粗
伸羹墻寓沒世之思其奈聲容之淩邈謹奉冊寶上
尊諡曰 敦文顯武仁懿孝明大王廟號曰 翼宗
仰冀冲鑑俯賜明歆聖繼神承流景鑠而不已祖功

宗德配耿光而於昭

大王大妃殿加上尊號玉冊文

伏以啓燕謨於初服璇闈仰 慈覆之恩闡鴻籙於
東朝瑤冊飾尊崇之典情文克備位號式宜恭惟
明敬大王大妃殿下德叶譽妃慶儲文母黃裳元吉
贊 聖祖而順坤朱芾斯皇篤 寧王而索震書載
塗山之化訓有本於名門詩登南國之風教實資於
中壺嗟眇末詎堪於負展而撝謙廼勉於聽簾繼
貞熹而抗裘冕之尊厥有先庚故事翊元祐而奠泰
磐之固允符亭午聖人誠著奉先 廟儀增而世獻

定惠推約已方供減而院劑蠲關一念於恩勤冲人
有賴囿羣生於持載厚地無疆諒闇之殷制旣終長
樂之漢儀可舉梧雲漫邈愴何及於觀光萱景彌長
幸有期於備物自今日萬年伊始必得其名亦我家
三后攸行則然於禮尊之至也孝莫大焉謹奉冊寶
尊爲 大王大妃加上尊號曰 文仁陰功與文教
並流憲三光而敷海柔道以仁心普洽包四德而配
春伏惟永播彤管之譽誕膺玄統之頌含弘俯育騰
遐祝於錫民垂拱仰成荷純祺於受帝
大王大妃殿加上尊號玉冊文

雲石遺稿 卷十一
伏以闡三讓於謙撝瑤籌彌邵釋萬幾於頤養寶冊
載颺 先后攸行今天其命恭惟 明敬文仁大王
大妃殿下周雅思齊之美漢儀長樂之尊宜君子之
家配鴻休於 皇祖爲聖人之母篤駿惠於冲孫迨
南面之仰成猗 東朝之同聽惟羣生困瘁飢寒之
際宵旰七年而寡昧起居飲食之間憂勞一念麟經
肅討錫孝思於尊親禹鼎昭奸奠倫彝於闢異居然
志學之齡已屆時則撤簾之旨迺宣自敬天爰暨親
賢 慈戒尙勤於施四粵初載已期今日 母儀靡
極於養千譬諸時雨洽而點雲過歛神功於巍蕩有

若泰岑崇而上緯邈凝至道於穆清矧坤元四紀之
光臨又天保九如之誕受將如何而報答德海恩山
庶因此而形容範金鏤玉微懇幸回於冲挹隆稱克
舉於揄揚謹奉冊寶加上尊號曰 光聖堯曰被光
比徽音於二典箕言作聖總遐福於九疇伏惟高拱
椒闈丕延萱景晨昏定省永垂覆育之仁民國訃謨
益仰提撕之訓

孝顯王后金氏冊 王妃教命文

王若曰夫婦人倫之始后妃王化之原此聖人勅制
於儷皮君子備儀於百兩也惟乾坤之相配卽 宗

雲石遺稿 卷十一
廟之共承爰舉彝章載揚顯冊肆予眇質叨守洪基
仰供 兩殿之怡愉俯遂羣生之字育外除既闕內
助宜資咨爾金氏名閥餘庥 東朝近派塗山毓慶
自文正以來四相三忠炎姓襲祥若太姜之後九人
十亂播令譽於蘋藻頌叶河洲佩懿訓於珩璜德符
媯泃僉詢攸定 慈教迺宣迨日吉而辰良又天休
之川至茲涓吉備禮冊封爲王妃誕膺寶籙益懋壺
儀嗣徽所以友琴昭儉宜其服練寢饋之誠由於孝
本支之應在乎仁贊大有之治勤惟玄統正家人之
位吉是黃裳可不敬歎於斯盛矣於戲日月有並明

之理陰陽無獨運之機含章則丕著柔嘉端本則永
懷昌熾故茲敎示想宜知悉

憲宗大王冊 世孫頒敎文

王若曰寡人罹體正之恫事莫重於繼序豕孫膺世
嫡之號禮采隆於陞儲斯乃稽皇典而率舊章于以
鞏洪基而續景命茲宣渙告用示咸休頃震邸承燕
翼之謨而甲觀騰麟趾之頌延頸之願共切係八方
兆民之心繞膝之歡政深符一堂三君之慶肆以寶
籙之彌衍爰有徽稱之肇加孫星寔副於前星位號
叶早定之美吉日載卜於今日儀文得預講之宜增

僚屬於講書衛從幸丁千一之盛會陪元良於問寢
視簪佇申重四之純祺何否運之極艱奄高暉之永
闕皇穹渺邈哀此貳身王室孤危凜乎一髮顧今延
國脉之道當以建儲嗣爲先惟先王父傳子之規
以嫡爲貴粵我家祖依孫之訓厥統斯尊神人之望
有攸歸宜七鬯之豫主宗祧之託不可緩况尺衣
之漸長睠茲在抱之孤允矣祇承乃考自孩提而挺
岐嶷之表由躬教而著仁孝之譽聰明睿智之迥出
尋常生有異質言語步趨之自合規度儼若成人承
華之位方虛母曰冲齡之少俟錫冊之命已久舉望

縟儀之亟行已於九月十五日冊封王世孫煥七章
而禋躬品物咸備崇貳極而繩武典禮鼎新寵命贊
上相而往宣恩誥臨大庭而誕揭人事之變嬗如此
縱切遇喜增愴之情天心之保佑可推尙爲轉危回
安之策是謂卿士庶民之協龜筮自此本支百世之
縣瓠瓜上以慰列祖陟降之靈下可遂羣生愛戴
之悃推恩覃惠旣值陬澂之同歡蕩垢滌瑕詎靳雷
雨之普洽於戲此三代有道之術國勢如磐石泰山
實萬年無疆之休天保爾升日恒月益懋周王之審
諭庶答夏民之謳歌故茲教示想宜知悉

純宗大王 翼宗大王 太廟頌教文

王若曰於乎繼序 皇祖祥禫外除茲予大亨 先
王昭穆並祔肆將訪落之遺意庸答過密之餘思禮
不敢過哀有未盡恭惟我 純宗大王姿挺上聖運
撫太平華渚虹流之符尼岑庚降之會在冲齡而懋
夙夜基命之念逮久道而收終始典學之功致 宗
廟之敬承 殿宮之歡放諸東海而準協日月之明
包天地之大譬如北辰其居嗟環域億萬羣生勞來
匡直之使自得厥享國三十四載親賢樂利之於不
忘所以聖功神化之大成罔非天德王道之極致廓

掃潢醜邦討用張痛闢洋邪民彝攸敘有夏象物之
器魑魅莫逃方春布德之綸草木皆樂精義則俟百
不惑治法則兼三以施國是大定於紹先兢兢乎陰
陽淑慝之際天命永祈於誠小憧憧乎水旱災咎之
間其惟聰明獻知神武而不殺夫斯乃鰥寡孤獨廢
疾者有養也矧茲克儉於卑室實由不顯於小心屏
外物之芬華宴居驗清明之象寂上載之聲臭躬行
有玄默之風猗謨烈無能爲名伊文章可得而見圖
書應奎璧之運化則有靈臺鳶魚制作回雲漢之光
奉以爲西序琬琰亦惟我 翼宗大王地當主器之

重天開繼照之祥濬哲文明堯于勤而舜攝謳歌訟
獄禹之道而啓承三善一有之資自齒學而謹世子
之法九經四勿之旨暨聽政而欽聖人之言是知繼
述之方皆以仁孝爲本玉牒歸美甲觀衍萬年之基
瑤觴集禧海屋添四旬之慶烝嘗禴祠之克恭肅圭
瓚而攝儀禮樂刑政之允釐叶笙鏞而贊化 睿工
摠括經史每頌討論之至夜分 宸藻動合典謨舉
仰尊閣之在天上邦有泰磐之勢朝登星海之謠何
閱運之重罹奄真遊之荐陟景籙未集於大統鶴馭
先催遐籌不及於中身烏弓繼抱神雲歛蒼梧之野

哀小子之藐孤慈天臨紫微之垣幸 太母之閔覆
漢家世獻縱或伸舉國大同之情周王追尊豈能慰
終天靡極之慟寓羹墻之深慕寶閣訖編摩之工拓
壇墠之舊規 太室就礪密之役肆當慨廓之日厥
有陞祔之文流光易適居然雕几之永撤彝典克備
時則玄服之皆將因祫事而迭遷三年之喪旣畢奉
禩位而咸秩七世之德可觀晨昏之尙有瞻依 神
寢孔邇雨露之采增怵惕 靈龕云遐本年正月初
七日躋祔于 廟犧尊盈孚龍旂承禧祖有功而宗
有德 列聖之陟降洋洋陳其器而設其衣多士之

雲石遺稿 卷十一
奔走濟濟喪祭有受牲幣稽壬戌之攸行孝思無窮
軒架遵 正廟而不作陶遂之誠方切休恤之憂亦
多體元履端愴物采之如舊滌瑕蕩垢喜霈澤之維
新於戲嘉與父老軍民昭告駿惠之頌自此春臺化
域祇承燕詒之謨故茲教示想宜知悉

大王大妃殿加上尊號 王大妃殿上尊號頒教

文

王若曰 太寢宗勛華之德並升明禋京室嗣任妣
之徽同晉顯冊其禮則國朝故事是日也月正上旬
猗 太母懿範隆功邁前代聖女哲后自 純祖冕

迎之日誕敷三十載蘋藻之治逮 翼考鞫懸之辰
永基億萬年瓜瓞之業原百福之始而婉愉先於
殿宮資萬物之生而勤儉本於家室方玄統之騰誦
遽蒼旻之降災緱岑之笙鶴未迴民胡無祿喬山之
弓劔莫逮理實難諶迺者宮闈抗裘之儀寔軫 宗
祊綴旒之勢翟禴降哀痛之教勗以先君麻冕荷鞠
育之恩閔予小子俟聖不惑有若增 七廟之制定
百世之獻繼 列朝之編視民如傷以至蠲東州之
採停南路之織轉北方之粟雖簾帷主於靚邃象魏
懸日月之明而帡幪遍於邇遐肖螭涵雨露之澤彤

管之模厚地史不勝書玉牒之頌慈天典有可攷亦
粵我 大妃思媚之譽寔贊 前寧人造端之休襲
芳猷於長秋婦道克慎迓純祺於彌月 母儀采隆
舊愴重以新哀暨今日尙賴保護 慈恩兼乎嚴訓
無一事不勤提撕璇闈承三朝之歡恒祝海籌之添
慶斑衣供千乘之養益思春草之報暉肆於 二廟
躋祔之餘合有 兩殿崇奉之舉儀文賁新於南面
孝以顯親爲先位號咸宜於 東朝禮惟備物而後
神憲仁粹之順序世德作求慶壽隆祐之辨名古訓
是式揄徽闡烈固無間於微衷居正標尊儘莫尙於

太上謹奉冊寶尊 明敬大王大妃殿下加上尊號
曰 文仁尊 王大妃殿下上尊號曰 孝裕邦典
上告而下布天運否往而泰來文室則顯武室則承
縱虛雲之寂歛王母之福壽母之喜庶靈春之長留
寰宇聳觀奚但縟禮之不飾雷雨作解寔惟 慈德
之普推於戲吉祥之事皆臻太平之象可見山川草
木摠入子育之仁松栢岡陵舉仰申錫之美故茲教
示想宜知悉

孝顯王后冊 王妃頒教文

王若曰易六十四卦乾元坤元爲之基詩三百五篇

周南召南爲之首是故天德莫大於配體王道必先於正家式遵弘規載揚明訓永惟媿匹之際實是教化之原有萬物然後夫婦父子君臣之倫得其敘矣合二姓以爲天地宗廟社稷之主不亦重歟媿泃觀刑贊虞廷垂衣之治洽陽作合衍姬家綿瓜之休蓋其百福源而四德全所以六禮備而九御統肆當中月之制已畢政須長秋之儀亟行 列祖之所願歆 賈由笄珈之承事 兩殿之所企待亦係珩璜之嗣音徵天眷於瑞符中垣耀後勾之位考邦典於嘉會大璋昭親迎之文 王妃金氏篤生名祖之門近屬

太母之系承奕世之鼎軸伊巫之忠蓋有由纘 皇祖之舟梁塗莘之福慶未艾矧茲懿範之早就允矣令聞之夙彰織紵組紃十年聽婉婉之教鐘鼓琴瑟六宮誦窈窕之章文定厥祥卜云其吉 東朝則哲之聖簡在柔嘉 先王於昭之靈默有佑隲基厥初而本支百世稽于衆而卿士庶民茲涓昌辰誕舉縉禮已於本年三月十八日乙未授冊寶正位二十日丁酉大昏禮成玄統治內黃裳在中聳羣瞻於肅雝釐爾女士奉 慈教於悅豫宜其家人譬若兩儀之交須斯義也合牢而合禋自此萬姓之俯育其本則

雲石遺稿 卷十一
獻繭而獻種翟禴初臨猗博厚之配地鳳綸遐暨庶
惠澤之同春於戲和氣融於宮闈歡聲溢於區宇至
靜至柔之德麟趾儲祥一家一國之仁龜疇錫福故
茲教示想宜知悉

大王大妃殿寶齡五旬稱慶頒教文

王若曰諸福致祥上天啓三陽之運大德得壽 東
朝躋五旬之齡喜深知年誠切愛日恭惟 明敬文
仁大王大妃殿下大任大妣之德女堯女舜之功昔
在 皇祖之御家邦衍鴻祺於主鬯逮夫小子之嗣
曆服垂燕謨於抗裘推惠澤以啓初元陰教薄海定

文祥以資內助 慈恩極天凡我血氣之倫莫不蹈
舞於顧復拊育雖古彤管所載孰能形容乎光大含
弘肆以箕範曰壽之徵誕屆孔聖知命之歲寶籙恰
符於大衍道則悠久無疆遐算載基於中身福之方
進不已惟此慶年之不節合有彝章之應行玉牒揚
徽是儀也摸天畫日瑤觴志喜其祝則北斗南山然
慈念執謙抑之衷而廷議却豐亨之舉盛德大業筵
奏縱出於顯印實心真情簾諭特發於懇惻予惟致
孝之道當以養志爲先禮所未伸豈無抑鬱之悃讓
而不有宜思將順之方與其鋪張宏休闡崇號於琬

璿之美曷若對揚明命尊 聖德於日月之光遂稽
貞純徽規式追甲寅盛典此所以仰承俯答質聖人
而無疑於是乎上告下頒監 先王而有訓莅斯庭
而屬獻發之會御春臺而迓熾昌之符騰歡聲於山
呼陬滢普聳溢喜氣於川至霈澤均覃於戲海籌長
添婺暉永駐庭衢達四溷神化於止慈岡陵等三廣
純嘏於錫老故茲教示想宜知悉

大王大妃殿加上尊號 大殿進箋文

篤商哲於湯孫燕謨克顯彰周徽於文母鴻號采隆
曷稱 慈恩祗承邦典恭惟 明敬文仁大王大妃

殿下河洲媿德沙麓協祥服練賁治播六宮之善頌
抗裘臨政覃八域之陰功肆當崇奉於璇闈允合揄
揚於瑤牒屆孟春而涓日載舉緝儀指南極而祝年
式增寶籙位序標尊於二字情文備美於三呼伏念
臣千乘供歡萬幾承訓慶流陬滢奉至化於厚坤壽
等岡陵展微誠於長樂

王大妃殿上尊號 大殿進箋文

薦吉事於穆清天回景命颺徽稱於長樂國有彝章
崇奉 母儀恭修子職恭惟 孝裕王大妃殿下德
符嗣妣功贊攝堯彌月慶儲導琴鐘而允協追王禮

雲石遺稿 卷十一
舉莅禕翟而克尊猗歟位號之加隆允矣情文之不
飾荷 慈麻於拊顧厚地高穹闡懿範於揄揚泥金
鏤玉諸福采增於川至羣情普切於山呼伏念臣尚
賴義方庶期熙緝草暉思報恒承萬歲之歡萱旭長
依益篤三朝之悃

大王大妃殿寶齡五旬 大殿進箋文

囿羣品於方春天休滋至躋五旬於長樂邦籙永孚
壽域歡聲昕庭瑞色恭惟 明敬文仁大王大妃殿
下壺儀育萬簾化登三坤元之贊乾元嘉頌已覃於
南國母道而兼君道隆稱允叶於 東朝屬 慈齡

誕屆中身伊景命聿懷多福謙光邁古縱無封岱之
文泰運迓新幸有呼嵩之典寶曆與莫暉初展靈籌
共萱景彌長伏念臣奉萬年歡以千乘養璇闈定省
頌箕範之康寧綵服怡愉詠魯詩之燕喜

大王大妃殿加上尊號陳賀 大殿親上致詞

詩頌壽母易贊嚴君 東朝正位允叶情文簾化無
競旁達八垠恭奉冊寶庭賀如雲

王大妃殿上尊號陳賀 大殿親上致詞

顯號肇稱懿範彌光生我之恩天地難量玉寶瑤冊
祇循舊章如岡如陵萬壽無疆

大王大妃殿寶齡五旬陳賀 大殿親上致詞
天眷 慈德錫以純祺載叶大衍於萬攸基維聖斯
謙克讓縟儀今茲告布先甲之規

徽慶園 親祭文

自違 慈顏一紀于茲匪樹不靜風或搖之永言顧
復昊壤莫涯徽音如昨愉色何時春暉下山曾不少
遲維霜與露若爲我思密邇東城玄隧入望晨昏餘
慕隔歲猶曠撫序明發鏡物增愴載攀松柏載薦芬
鬯蠲饗大羹宛象隆養神理罔間昭格是貺

延慶墓 親奠爵文

自我哭爾序二朔五當寢而惕膳若有佇愉聲婉容
竟莫能覩爾忍舍我幽室攸處四載分勞維以忘憂
溫文日邈霜露易適猶幸鮒卜密邇 珠邱世適陞
儲寔藉餘休每歲謁 陵我駕爾從今我來斯爾隧
已封有洞者酌有苑者松靈如不昧庶悉哀衷

懿陵 親祭文

於皇有作之德之純淵穆爲度其止則仁五載端拱
百世不忘因心惟友殷及彌光聖聖相承大業所由
凡今熙洽孰非洪庥亦粵 宣懿配尊嗣音式祔
仙寢禕翟如臨日月逾邈聲容曷追節屆肅霜采增

雲石遺稿 卷十一
永思哀我繼體不吊于天爰卜玄隧象設彌連雲鄉
月遊悅侍晨夕祗薦苾芬尚垂歆格

宗廟冬享 親祭文

於奕 太廟 列朝攸格洋洋降福自古在昔小子
承禧敬共朝夕國本新鞏寧我 宗祏維時大烝百
禮有繹黃流旣潔大房孔碩周還裸薦優然咫尺尚
庶歆我啓佑無斃

孝成殿誕辰酌獻禮 親祭文

於皇 皇祖降聖以庚天維不已克配高明三紀凝
旒澤流無疆真遊胡遽沒世可忘小子惇惇夙夜恣

祀 先王攸憲 太母是恃清廟旣修休有烈光西

序尊閣煥其爲章愾彼迅邁辰又臨誕載瞻羹墻載
攀圭瓚 壽母 文子緬昔 正廟是日稱兕 寧
考之孝頰仰曷逮時物增傷恭將哀忱式薦馨香

孝和殿誕辰酌獻禮 親祭文

禰寢有恤追王之禮基我 宗祧於萬是啓堯勤舜
攝會幾年所沒世謳歌 睿化攸敘藐茲含恤永離
于怙云胡末音又承 皇祖三霜易遁舊恫采增尚
賴默佑景命其凝 聖製旣刊 列朝遺則將躋而
耐聿觀厥德有悽者露虹節載逮致千乘孝攀奉何

地紆衣明發耿光如臨齋孚盈瓚庶或顧歆

孝和殿冬享 親祭文

寧考在上終天之思贊華以協頌謨則詒德必饗保
其制緣情密邇者寢庶承容聲迨朔三告當躋而祔
禮雖莫盛曷旣孺慕稽于祀典在冬日烝小子躬將
心香是升

孝成殿酌獻禮 親祭文

禫事何遽祔期又邇太虛雲寂三霜水駛瞻仰 神
寢若無依恃矧茲月正濡露之履觀光揚烈悅臨庭
止圭璋駿奔亦有多土方慕堯羹將撤周几小子慨

廓終天可已載薦泐酌情緣義起明監在上庶歆誌
祀

孝和殿酌獻禮 親祭文

寢殿旣奉寅杓再回宛瞻西序庶慰南陔疇無孺慕
莫如我哀禮則然矣情有窮哉矧予冲子端冕釋衰
太室宜展明堂將開尙藉餘麻否往泰來百世觀德
雖在實枚報本之誠曷知攸裁迨今未祔恭奠雲壘

宗廟春享兼祔 純宗 翼宗兩朝祭文

宗廟之禮合禘爲重爰祔爰祧爰序先統藏夾載記
訪落登頌遵此舊典勉我餘慟猗歟 皇祖光繼

雲石遺稿 卷十一
列聖三十四年度以天命歷滂百王於斯爲盛至德
隆功世獻攸定 翼考仁孝大訓是弘漢觀篤慶周
寢藹誠何天不吊否運相仍緱馭喬封攀慕采增旣
舉追隆亦屆卽吉昭穆並躋灌薦咸秩世次當遷卽
景宗室耿光愈遠古制莫越以歲之春以月之正衍
我綏我時享肅將瞻仰於昭陟降洋洋黃流朱瑟錫
嘏無疆

太祖大王御真奉安光明殿酌獻禮 親祭文

皇矣 藝祖天挺上聖金尺彰符震檀凝命載奮神
武業大德盛監殷有光媿周無競運惟應順肇建人

極遂啓我東溥彼區域帝庸耆之永基千億暨于眇
末典有儀式睠茲雙城誕彌之地岐柞豐榆坤珍闡
秘卽宅而殿 睟容所莅萬歲葱鬱百靈拱侍何蠢
之變至及寶幘禮舉大臨驚慟靡定奉舊摸新克慎
克敬閱序敦事丹青告竟八彩重瞳儼如昔日髣髴
陟降神人胥悅在初陪來若軫其旋祥飈殿後瑞虹
導前行將還安 原廟舊鄉北之父老夾路頂香虔
揭涓期明禋筮吉小子躬將庶歆芬苾

永禧殿酌獻禮 親祭文

赫赫明明 皇祖以之德享于天克勗洪基啓佑無

雲石遺稿 卷十一
疆惟千萬斯尚有攀慕舜瞳堯眉載瞻北殿亦既摸
移載瞻南殿裸薦是宜於彼乎此冲鑑昭垂殷禮肇
稱况侍黼儀
右第一室

光廟中興用靖弘功武定文致允躋邳隆萬歲堂構
八域帡幪累洽重熙永鞏我東威顏孔邇肅肅靈宮
以聖承聖 二祖 三宗年代雖夔神理則通躬將
洞酌尚監菲衷
右第二室

憲憲 章廟潛德儲祥篤生聖人奠我 宗祊推原
景福於戲不忘緝儀追舉寶錄永昌符彩嚴臨 真
幘斯煌睠言 神龕優然羹墻蠲吉展省式葳馨香

尚冀保佑陟降洋洋

右第三室

於皇 肅考姿挺聖神體道基命之德之純奉先以
孝啓我後人迺睠寶殿猗 三聖真王配在天縟禮
彌新錦幘瑤軸籩豆歲陳藐予叨承追慕始伸庶幾
降格祇薦明禋
右第四室

英廟壽考五紀光臨皇建有極惟精一心盛德至善
入人者深永言配命式至于今祇瞻日表况聆 玉
音咫尺黼座彌切菲忱饗儀則備益齊以斟於昭在
上冀賜顧歆
右第五室

玄巖書院賜額文

昔君 仁 孝 顯 肅四聖歷九十載國幾不競
強敵外棘疇任尊攘凶黨內訌疇閱消長尙賴同德
秉義植倫卽公三世世作元臣迺休光迺鍾秀氣
迺遭熙運迺膺隆寄率乃伊巫顯亦周召矧惟憑几
承我 正廟旣結肺腑遂許心膺左右 先王日贊
時敘秉執之嚴精義之微恩推報今貢無非幾處崇
以卑履艱如安傅德保躬炳然者丹亦粵 太母篤
生 聖人閔予所恃 慈覆之仁追源溯本功孰能
儔天之降公邦國與休平素擔夯柱石山斗而今視
之繫三不朽節惠按諡二字忠文功宗記祀一體臣

君蹟公終始匪以襲取金玉爲姿經禮有受內蘊和
順外著清灑異趣同聲君子人也早歲館閣麟鳳發
軻道因文悟學由年進糠粃陳腐笙鏞休明豈必師
承獨造其精以若成就有言有德雖不自居多士是
式睠彼玄巖菟裘晚計鞠躬隨義明農違誓川雲嶺
月杖屨所止百年俎豆舍此何以載採儒籲載稽廟
詢厥有成命曾慰衿紳院宇始就涓吉妥靈予懷增
愴尙記典型韶顏皓髮徐趨燕見字或授口誠輒溢
面崇德象賢其儀維嘉逝者如斯驅江之波璇額旣
宣洞酌將酌文以侑之靈庶不昧

徐參判 英輔 賜祭文

苑彼達城奕業圭冕先卿桓桓肇由武顯歷摠六營
寧考攸選有起階闈趾美繼善升載宿衛恭慎靡舛
射以觀德虎榜再闡既司出納亦任理劄議讞詞訟
兼務實踐列闡授鉞驥步始展迺築于壇率由舊典
曰廉與儉似卿者鮮惟其心好是以福衍兩世元戎
為邦之彥典型所寄干城是勉曾予聽輦注意不淺
庶藉宿望鎮此京輦云胡隕魁完人其歿忝官侑酌
盡懷未戢

濟州漢挈山厲祭文

六氣失序頻年為沴民或遘之厥疾維癘逃矣瀛島
亦降是戾壑連委齒醫絕分劑為天為札以千而計
念爾遊魂飄蕩靡繫心焉若恫罔間絕裔有殤則招
爰稽古制亟命近臣侑彼海溼生懷死慰庶無不惠

斥邪綸音

王若曰嗚呼中庸曰天命之謂性尚書曰惟皇上帝
降衷于下民若有恒性其論一原昇賦之初曰天曰
上帝者天以形體言上帝以主宰言也曰命曰降衷
者非諄諄然真有詔誥也一理所發二氣幹焉四序
所運萬品育焉人得之為性者其德有四曰仁義禮

雲石遺稿 卷十一
智也其倫有五曰父子君臣夫婦長幼朋友也此皆當然而然無待乎安排布置勉強作爲故曰天生烝民有物有則率之則爲順天悖之則爲逆天凡所以奉天而事上帝者豈有出於四端五倫之外哉嗚呼粵自羲農堯舜繼天立極其寅畏而祇承惇敘而敬敷者惟此而已亦粵我夫子祖述憲章之後至于有宋羣賢其明天理淑人心者惟此而已毫釐有差猶謂之異端况乎陰沴荒誕怪詭不經之外道乎國有常刑必殺無赦此所謂辟以止辟也嗚呼我東處文明之鄉襲仁賢之化美風善教厥惟久矣洪惟我

聖祖受天明命肇造區宇明彝倫以立人紀崇道學以正國俗 聖子神孫儆戒不怠丕克對越于天而休運永孚儒賢輩出上自公卿大夫下逮閭巷匹庶戶服洙泗之行家誦洛閩之書男以忠孝爲本女以貞烈爲重冠昏喪祭必遵乎禮士農工商各遂其業式至今胥匡以生國家賴焉矧惟我 正宗大王挺天縱之聖紹百王之統聲明文物粲然具備而不幸有凶賊承薰者購來西洋之書號爲天主之學非先王之法言而潛相誑誘非聖人之正道而馴致耽惑駸駸然入於夷狄禽獸之域於是乎 正廟憂其久

而愈熾也治其魁宥其餘克推欲生之念俾開自新之路恩莫厚矣德莫盛矣雖豚魚之頑梟獍之凶亦當有所感悟而本性既喪舊習不悛以至辛酉討邪之獄而極矣其薄有才藝者艷其新而倡之矇無知覺者樂其誕而從之身處卿宰自作窩窟家傳詩禮亦有染污而文謨則變薙制敢行都市嗣永則裁帛書欲招海舶凶圖逆節於斯爲急苟非我 純宗大王暨我 貞純大妃悉燭魑魅之奸大振斧鉞之威廓闢而痛鋤之則國之爲國人之爲人有未可知也嗚呼今距辛酉四十年所禁網淩疏邪教又盛虺蜮

匿影根莠易種逆豎變姓而出沒妖譚齋貨而交通潛募洋人至再至三而聲氣接於異域脉絡遍於同黨比諸辛酉殆有浮焉肆予小子謹遵 皇祖之謨恭奉 慈聖之命不敢不行天之罰雖其迷昏而莫之返淪沒而莫之拯駢首連肩自底大戮而予惟爲民父母其能無哀矜惻怛之心戚戚于中哉嗚呼予聞不教而刑謂之殃民予當以邪教源委逐條辨析用播告于爾在廷臣隣及我八方士女俾各曉然爾尙欽哉嗚呼彼爲天主之學者曰是學也乃敬天也尊天也天固可敬可尊而彼所以敬且尊者不過如

雲石遺稿 卷十一
滌罪邀寵之諸鄙事自歸於慢天褻天也吾所以敬
且尊者卽向所謂四端五倫之昭天命順皇降而日
用事爲之當於理也邪正之分不待兩言且彼耶穌
云者不知其是人是鬼是真是假而其徒之言以爲
始以天主下降死復上作天主爲萬物民生之大父
母天也者無聲無臭人也者有軀有殼斷不可相混
而今以天謂之降而爲人以人謂之上而爲天是有
何依稀可惑之端而若是之矯誣也爾試思之往古
來今有是理耶嗚呼匪父何生匪母何育欲報之德
昊天罔極而生民以來漸滅他不得之大本也彼乃

以生我者爲肉身父母天主者爲靈魂父母親愛崇
奉在於彼不在於此以自絕其父母是果血氣之倫
所可忍乎祭祀之禮所以追遠報本而孝子之不忍
死其親也神理人情不得然而彼乃毀主廢祭謂
死者無知苟如是也彼所謂靈魂又何所依靠首尾
橫決不成倫脊虎狼惡獸也尚有父子之情豺獾微
物也尚有祭祀之義則彼雖圓顛方趾曾虎狼豺獾
之不若人之無良胡至此極嗚呼君臣之義無所逃
於天地而彼乃以教皇教主作爲稱號不啻如戎狄
之酋長盜賊之渠率是欲攘司牧之權使政化無所

雲石遺稿 卷十一
底命令無所施也禍首亂本孰有甚焉嗚呼有陰陽
必有夫婦不易之理也彼乃以不嫁不娶妄托貞德
其下焉者男女混處穢亂風教由前則人之類滅矣
由後則人之倫瀆矣無父無君既至於此夫婦之際
又何可論至若聖母神父領洗堅振等種種名色愈
出愈幻要之爲狐魔巫覡符水詛呪之惑世者也粗
具見識寧或疑眩而竄是天堂地獄之說易哄蚩蠢
然此釋氏之陳腐也前人之辨已無餘蘊不足更事
劈破而是曾孰見而孰傳之也蔽一言曰謊說也彼
亦均受天賦并充人類而乃欲敦棄五常滅絕三綱

以求其身後之福於恍惚茫昧之地者不亦惑之甚
哉求福之道實有之矣詩曰永言配命自求多福又
曰豈弟君子求福不回配命者合於理也不回者不
爲回邪之行以要之也如是則福自至不如是則欲
求福而反取禍也予聞耶穌凶死之竄酷者也其學
之爲福爲禍於此可驗而不惟不爲之視以爲懲乃
以刑死爲樂地刀鋸桁楊啓不知畏如醉如顛莫可
提醒非愚則妄吁可哀矣嗚呼此若爲光明正大之
教則何必講授於昏夜密室之中嘯聚於深山窮谷
之間而廢種蠲孽失志怨國之徒下流至愚騙財誨

淫之輩互稱教友各設邪號藏頭隱尾打成一片也
哉卽此形跡已判其至凶至妖而究竟爲計不出於
黃巾白蓮之包蓄耳彼豈非生長於此邦食息於此
邦者乎此邦之俗只是四端之擴充五倫之培植而
父祖之所相沿師友之所相資皆在於是則何故舍
此邦所共由之坦路甘心於幾萬里外異類之邪說
以自就罟獲乎嗚呼彼浸漬之深錮者盤覈之畢露
者固已成伏厥辜而其未及現發者又不知糾結如
何滋蔓如何死者雖不足恤生者猶可不變彼皆吾
赤子耳忍使之一向沈蠱不思所以牖昏嚮明之方

乎今予敷示心腹非予言也乃惟天之經人之維古
昔羣聖之訓也嗟爾臣黎欽哉欽哉父詔其子兄詔
其弟其所訛誤者必思所以開導焉其未陷溺者必
思所以勸戒焉又或有開導勸戒而終不率者必思
所以殄殪而懲創焉俾此一種毋敢更容則豈不休
哉豈不休哉孟子曰經正則庶民興庶民興斯無邪
慝矣爲今之道其惟敦行誼以修其孝悌忠信篤經
術以習其詩書易禮而勿以趨尙放縱背前聖之規
矩勿以考據細瑣侮先賢之訓詁使我章甫衿紳粹
然一出於天德天彝自然之則則吾道不期扶而扶

雲石遺稿 卷十一
異學不期斥而斥彼感發而自奮警惕而自悔者庸
詎無去邪歸正之理哉嗚呼書不云乎百姓有過在
予一人今茲邪教之橫肆職由予寡昧不能導率之
咎反躬自責若恫在已而載念爾一寒一煖一飢一
飽之節罔非予小子夙宵憧憧則其於爾性命之所
關係倫彝之所維持爲人爲獸之所界限剖判者予
又安得不重言復言哀痛而諭之也

箋文

謝 實錄洗草宴宣醞箋文

伏以工訖木天彤筆寓 喬陵之慕恩霑湛露黃封

擊內府之頒曲察微勞普加優眷嗟周王之於繹尙
虞史之若稽一點太虛固神功之莫狀千秋石室伊
實事之可徵弓劔澣遐徒仰布昭於方策羹墻孔邇
舉懷殫竭於纂修攷諸記言動之本文敢曰摹天而
畫日參以注起居之舊錄畧成繫月而冠時肆竹編
亦旣汗青而草藁行將洗墨丹藜颺彩幾年秘閣之
課程玉板聚珍一部名山之藏弄詎意奉先之孝特
推體下之仁陳四簋之嘉羞太官供七撤上尊之法
醞近侍傳盃羣情切旣醉之榮沒世增於戲之感伏
念臣等材非良史躬逮聖人守柱下書愧三長之博

雲石遺稿 卷十一
識尊上典愴四表之餘光茲蓋伏遇 主上殿下
丕纘詒謨永圖揚烈親賢樂利定世獻於 寧王祖
述憲章合 宸篇於 列聖遂令異數併及諸臣臣
敢不益贊儀刑恒勤追報餘生塵刹縱未補於祇承
昭代笙鏞庶有所於善述

進 國朝寶鑑續編箋文

伏以奉 列祖之瑤圖誕撫五百年景錄述 三宗
之寶訓丕承 十九室原編成始終玉振金聲邁古
昔天球弘璧言念此篇之作龜鑑允符前代之有典
謨在天上尊閣之心法則相傳精一見書中備載者

治功則悉敘六三較石室之瓊函規模或異倣 璿
源之玉牒詳畧不同粵 光廟初年始初 四朝之
紀逮 元陵繼序擬成一統之書洪惟我 正宗大
王挺不世出之姿膺大有爲之運天德人文之本虞
夏可徵外王內聖之功漢唐何論尊正統以承魯史
寤寐風泉集羣書以會宋儒秋陽江漢於昭對越思
先績之丕彰至是勤孜軫舊章之永率遂有全書之
序次亶由初政之發揮揀詞垣之臣而分任製述考
木天之史而皆仰稟裁 聖子神孫燕詒之曰有受
文謨武烈駿惠之於不忘肆惟我 純宗大王德洽

雲石遺稿 卷十一
蒼生功參玄宰三紀帡幪之化八埏鼓舞之治北辰
不動而拱衆星躬先恭儉東海可推而準賊孝行貫
神明闢洋島之異言民彝是奠靖潢池之小醜邦討
用張譬時雨普覃皆自得於太和元氣雖虛雲寂歛
尚餘思於海滢山陬亦惟我 翼宗大王代庶政於
倦憂協重光於巍蕩仁孝英明之孔暢固至德之難
名謳歌訟獄之攸歸儘大猷之弘濟昕庭琬琰備物
采於顯親清廟圭璋盡情文於攝祀振窮乏於蒲盧
之政凡厥庶民育俊英於喬木之家思皇多士猗宏
治之相繼而續纂之未遑憲章祖述之功前聖旣傳

於後聖堂構菑畚之事今文可監於古文恭惟 主
上殿下纘 祖宗創守之基懋天地彌綸之道雲章
播頌博尋禮樂之原奎彩協占上應圖書之府拓
神殿而增肅雝之美頻觀耿光遷 喬陵而獲融結
之祥永寧幽光啓昌辰於鼎盛鳳曆調元迓休祥於
升平龜疇集福肆以奉先之念聿追裕後之規合六
慶而肇稱載颺顯號趁三元而虔告爰舉賀儀若
寧王彝訓之輯成卽我 后淵衷之義起寓羹墻之
慕質聖無疑作型範之資發凡爲例伏念臣等自前
歲而編摩載始暨今秋而考校甫完才識空疎敢自

期於摹畫課程淹滯竊有愧於述刪如繫月紀年之
或簡或繁就本文而謹定至敬天尊祖之大經大法
因舊體而恪遵茲惟六十載布昭允矣 三聖人柯
則照臨如日月煥有文章沛決若江河本諸典學弁
卷之文繼作 宸藻煒煌進書之禮復行袞衣端穆
增光于昔大備於今宜常日濩蠲以爲金鏡每澄心
夙夜如奉 玉音 累朝垂經國之方惟在親賢而
樂利百世有安民之術政須匡直而勞來克儉克勤
比禹功而無間庶言庶慎雖文德而罔兼斯皆萬化
之源可以一隅而反非止歡欣於匝域寔爲悅豫於

在天縱無汗竹之勞詎忘獻芹之悃

上樑文

興政堂重建上樑文

伏以東井鎮朱明之位辟災延祥北宸憲紫微之居
舊制新構上天申命庶民子來惟西闕興政之堂卽
列朝視事之所規樞則有正殿便殿之別寔爲燕涓
之深嚴基址則處內廷外廷之交蓋取晉接之密邇
雖土階三等惟儉是昭抑明堂一筵以高爲貴一日
萬幾之所自出八域羣生之所共瞻當 仁祖光啓
之初永鞏堂構之業逮 元陵常御于此采勤塗墍

雲石遺稿 卷十一
之功夫何漢未央之罍罍莫賴周司烜之木鐸敬天
威而重民力固宜有恐懼省約之方監 先王而啓
後人不可無修舉廢墜之典恭惟 淵德顯道景仁
純禧主上殿下化闡封屋德懋卑宮凡政刑典禮傳
家之規遵而勿失至苑囿臺榭奉身之物泊然無爲
然而詩之於斯于君子膺莞篔之頌易之於大壯聖
人玩棟宇之占矧矩矱之攸同可謂事半而功倍伊
經始之勿亟詎云時絀而舉羸爾乃營室則載屆中
星匠師則爰求大木海上撒泛材之役許邪息肩都
下募遊食之徒工稍稱事地不改矣楚臬可尋民曰

樂哉岐嶷相勸所以天地乎體象陰陽乎經緯居然
闕庭之神麗宮室之光明重楹複檐之橫縱虬尾旖
旒九閭八牖之開闔芝房噲呶制鼎新與仁政而
前後同揆鳩工漸訖並會祥而次第告成華構旣瞻
寶額仍揭都俞吁咈之自今伊始起元首而協寅祖
述憲章之千古有光正南面而恭已肆獻隆棟之吉
庸贊脩樑之勞

兒郎偉拋樑東曙色先添寶屐紅報道青陽開左个
絲綸歲歲夙祈豐

兒郎偉拋樑西白門佳氣四時齊今天正屬休明運

五夜星文共聚奎

兒郎偉拋樑南殿角微涼苑樹含遙指老人星作頌
岡陵不待等爲三

兒郎偉拋樑北太華凝碧參宸極興雲降雨竟誰功
知有名山長鎮國

兒郎偉拋樑上一心對越承嘉貺堯天舜日爛輝光
民不能名巍與蕩

兒郎偉拋樑下 王曰問朝兼問野俯視蒼蒼薄海
隅幘幪盡入千間廈伏願上樑之後輪奐長輝苞茂
增美有方興未艾之象庭衢八荒啓爲政以德之基

本支百世

通明殿重建上樑文

伏以卑夏后之宮昭其儉也考周王之室卜云吉焉
斯誠億萬世無疆之基矧惟五十年未遑之典蓋聞
易闡棟宇之制王者所以定宸居書揭堂構之謨聖
人所以保大業正位凝命荆垂雖勤補弊興衰繼述
尤美是以 皇朝故事襲駿祥於謹身我家遺文纘
鴻基於思政自東闕載營於昌慶而內殿莫尊於通
明坤靈協龜淑氣啓青陽之位乾符著象瑤躔配紫
微之垣碧瓦穹崇統六宮而臨下彤庭軒豁環九闈

而處中粵 成廟養千乘之辰 圭臬始勅逮 穆陵
旋八鑿之後 輪奐重輝猗 列聖之相承 遂諸福之
畢至 百禮騰岡陵之祝 玉牒瓊觴 萬靈護雲漢之篇
璇筆寶墨 夫何亨嘉之運 中經鬱攸之災 先蹟莫寓
於羹墻 攀瞻無地 遺志未就 於塗墍 因循有年 恭惟
淵德顯道 景仁純禧 主上殿下 春臺調元 明堂布令
烈承謨顯 每軫漢宮之奉先 制定治成 克懋魯府之
仍舊第 當百堵皆興之際 合有一體 並建之方 皇天
之警告 孔昭庶或爲扶持 全安之道 祖宗之畀付
甚重 豈可無儀刑憲章之規 曩也歲儉而暫停 雖不

容已今焉 時絀而更舉 實非樂爲肆以苟完之圖 先
施若保之政 正供至減 內院十行 謙挹之恩 綸經用
不煩外廷 一念節省之 睿度遊手 應募稍弛 庚呼
之憂 衆力趨功 競效子來之悃 仍範圍於在昔 倏經
營於維新 雕玉裁璫 陋西京之靡麗 園規方矩 像北
宸之尊嚴 噴魚尾而壓朱明 百祥回湊 疏龍首而抗
碧落 五彩上蟠 其制則叶右通左達之宜 其義則包
高明廣大之美 自此磐泰之彌 鞏備三闕之規 樞居
然輦革之增隆 聳八域之瞻仰 載颺如月之頌 庸答
不日之勞

雲石遺稿 卷十一
兒郎偉拋樑東駱峰佳色碧葱龍年年迓得春先到
解贊烟花育物功

兒郎偉拋樑西碧沼涵空駕彩霓定有瑤桃來獻祝
五雲多處萬年躋

兒郎偉拋樑南庭榴初結苑桃含薰颺正屬宮人綌
合把彤毫頌葛覃

兒郎偉拋樑北黃裳吉協坤之德已從端本發爲仁
暨彼朔南歸化域

兒郎偉拋樑上仰視瑞雲華盖狀去作油然雨我田
太和元氣濃如釀

兒郎偉拋樑下地效奇祥天賜嘏至化渾如草偃風
二南餘韻登宵雅伏願上樑之後日月麗薨山河扶
戶軒閣徠九苞之瑞舜殿調五絃之和厥庶民錫敷
寔推正家之盛我後人啓佑咸仰作室之休

南長寺大省樓上樑文

伏以禪鐘再揭大衆警夢覺之關梵樓重新諸佛證
成毀之運人天聳賀巖壑增輝惟彼長白道場洵是
新羅古刹南淵北石嶽稱上洛之三真鑑孤雲年徵
太和之四宗風永振於緇社便成一大事因緣慈雲
長繞於琳宮爰有千萬間制作肆我豐壤趙氏自譜

雲石遺稿 卷十一
牒入刊之後而板閣卜築于茲山川拱而鬼神呵地
靈旣叶風雨除而烏鼠去佛佑斯憑所賴沙門之護
持有關祗林之衰盛凡我同姓或作守土之官卽於
此山每酬布金之願嗟舊攸之告警遽蘭若之招災
金鉢呪龍噴法水而何及寶幢馱象蕩業火而莫回
魯殿獨存於滄桑幸保我百世尊閣曹溪並入於瓦
礫若爲此七寶莊嚴時有龍潭上人乃能鳩合衆力
善哉檀越之普施發如是願心儼然舍衛之舊觀做
無量功德第茲重建之役甚鉅所以大省之樓未遑
龍華散空幾歎淨土之鞠茂蠡簏委地無由迷津之

喚醒是用一省遍募緣之文半載勤僦工之念信男
善女咸效福田吉日良辰復剏法構偉材巨礎繫無
脛而自來華簷峻甍殆有神而相助迴臨千尺鳥飛
由地下視自發六時鯨吼若天上聞過去之劫灰一
洗現在之慧月重圓多生不迷共聞鏜鞳之響吾宗
亦喜益鞏剏之藏載頌菩提庸助郎偉
兒郎偉拋樑東震朝瑞日颺紅要見本來面目須識
大地虛空
兒郎偉拋樑西登登須彌如梯緣湊斬釘截鐵根鈍
拖水和泥

兒郎偉拋樑南潮音夜泛伽藍百八金剛珠顆三千
貝多經函

兒郎偉拋樑北金色祥雲何國心心一印密囑法法
千燈古德

兒郎偉拋樑上三十三天天曠空是色色是空妄亦
真真亦妄

兒郎偉拋樑下如是我聞般若演時三乘公案悟處
一棒劈打伏願上樑之後羣品廣度諸業盡消甘露
之門洞開苦海之航利濟蓮龕白湧有時金人之扣
筵麩鎖綠沈無恙木天之皮架

三嘉縣鄉校移建上樑文

伏以虔州廟之卑陋褊迫爰遷舊基靜江學之崇邃
廣深載朐新構蓋人文煥而衿紳有所式地理叶而
籩豆得其尊是用遵一邦大同之論舉百年未遑之
典者也竊惟三嘉縣舊鄉校擇舛爽塏制遜宏嚴數
仞之宮墻莫稱實欠吉地之崇奉四時之絃誦相妨
每切多士之咨嗟山川久闕於毓材豈但爲榷楠櫟
樟而止龜筮共違於相土殆若有荆棘蓬蒿者然况
乎上雨旁風正值修葺之役良辰吉日將行移安之
儀與其苟合而苟完曷若盡美而盡善睠茲錦山之

勝允矣淑氣所鍾一岡對拱天門昂昂若靈龜鞠瑞
二川合注坤軸蜿蜿然交龍呈祥圭臬定中極高明
廣大之域圖書應上卽藏修遊息之方爲之廟而神
道可安設此地而造物有待於是竊取緇衣之弊而
改遂倣原田之新是謀道臣據儒狀而審形便仰稟
上旨宗伯按祀典而頒品式俯循輿情爾乃官則鳩
財募工士則釋經敦事徠松甫柏入以時於山林般
斧郢斤遵不頗於繩墨教亦多術漸就堂室之規模
仰之彌高宛瞻衡斗之氣像於焉金石之秩秩每年
兩丁自此詩禮之彬彬吾黨小子風水非舊日之比

輪奐爲永世之觀先民有言必改而後太守之力將
多于前斯追三雍之雅歌恭陳六偉之善頌

兒郎偉拋樑東螺鬟疊翠似龜蒙向晨試看晴暉上
先遣紅雲護聖宮

兒郎偉拋樑西槐柳陰陰覆大堤希瑟清琴開講市
遷喬出谷答鸞啼

兒郎偉拋樑南晶川十里綠於藍稼村菜圃經多少
來作門前半壁潭

兒郎偉拋樑北背岳文星撐紫極雲雨時時望旱天
駿髦世世生王國

雲石遺稿 卷十一
兒郎偉拋樑上斯文萬古高山仰一言可贊聖人容
如覩溫良恭儉讓

兒郎偉拋樑下一色黃雲登四野樽俎兩楹黍稷馨
青衿濟濟趨齊夏伏願上樑之後人誦虞夏之訓尸
服鄒魯之風該八條於格致誠正修齊治平教以冬
教以夏分四科於德行言語文學政事陞之縣陞之
州禮秉駿奔喜芬苾之永忒化敷蛾述驗菁莪之遐
覃

玉笛山房上樑文

伏以十里青郊一區碧澗洞天福地既秀且幽林曠

而疎石平而潔宜巾宜履宜吟宜嘯可滂可浴可陟
可攀續倏忽而載營宛中央而爰處此相國彝齋公
樊泉新築之玉笛山房也惟公蕭灑出塵之想通明
軼世之才少日詞翰噪芳譽於韋布中朝雅望播熙
績於圭璋允協輿論光躋元輔丹心皓髮幾殫補袞
之忱黃耳玉鉉方藉調羹之手然而端委乎廊廟
聖眷雖殊慕羨乎邱園私情恒切朝上書於北闕夕
養病於西樞車軸衣袂蒼生攸望巖居川觀赤烏將
閒於是洛陽有花外之車杜曲爲舍人之墅棋樽時
其遣興案牘罕其貽勞鶴壇並鹿柴相連樵唱與農

雲石遺稿 卷十一
謳互答俗憂不入我樂無窮爾乃拓舊基展新構盤
桓有所華儉得宜涼軒煥室之備四時苔屺薜牆之
通一逕爰用古玉笛一枚貯之仍以爲榜不恒之物
可貴也存碧玉何山斲奇形於七孔金官故國發秘
藏於千秋昔人剗製而滌邪君子審音而攷古是可
掩瑤琴而停鳳管何須左丹水而右醴泉蓄儲如金
石圖書供養若烟雲花竹茲附奩輪之頌庸伸郎偉
之文

兒郎偉拋樑東水漫於野草連空田間日與村翁飲
肯使他猜舊相公

兒郎偉拋樑西觚稜入望五雲齊定知均逸非長往
京兆應須護舊堤

兒郎偉拋樑南滿野黃雲樂不堪自是吾公承弼後
曾將順四贊登三

兒郎偉拋樑北三角羣峰長秀色此日調疴答以何
指山惟祝於千億

兒郎偉拋樑上壽曜台躔光並亮且向斯間陶性靈
最閒暇處最昭曠

兒郎偉拋樑下過雨庭除飛瀑灑莫道關心一小亭
偉材巨礎曾支廈伏願上樑之後珠媚玉輝鶯歌燕

賀名樓景物與朋友共歡晚境逍遙為生民自愛

雲石遺稿卷之十一

雲石遺稿卷之十二目錄

祭文

憲宗大王聖痘送神文

原任直提學左議政李公存秀內閣祭文

寧邊南門改建告由文

祭纛文

祭外舅郡守金公文

祭仲氏牧使府君文

祭姪女李氏婦文

祭姐夫郡守尹公慶烈文

祭始祖侍中公墓文

祭十四代祖妣固城李氏墓文

祭十三代祖佐郎公墓文

祭叔姊氏淑人文

祭仲姊氏淑人文

祭從子判書秉龜文

祭伯氏忠敬公府君文

碑銘

恩彥君神道碑銘 并序

南原殉義碑銘 并序

靈圭大師殉義碑銘 并序

紀功祠碑銘 并序

麟蹄陶菴李先生 緯 遺墟碑

尚德祠碑陰記


墓碣

十四代祖妣固城李氏墓碣

十三代祖工曹佐郎府君墓碣

外王考南原府使 贈吏曹參判洪公墓碣

仲氏羅州牧使 贈吏曹參判府君墓碣銘 并序



雲石遺稿卷之十二

祭文

憲宗大王聖痘送神文

惟皇天降監惟我 祖宗默佑而陰隲乃於太歲癸卯之秋九月下旬我 聖上爰有痘候暨越月上旬得勿藥有喜之兆此蓋我 肅廟癸亥 純廟乙丑及今日三度無疆之慶也萬姓之所顛仰百靈之所衛護固宜大亨純吉而痘之爲證若有神焉其來也迓之以潔淨其去也送之以豐腆起於俗尙仍成恒節揆之古禮亦不外此於是乎宮中府中同然一辭

雲石遺稿 卷十二
咸以 聖痘之功歸之於神椒糝餌饌以供醉飽車
輿舟船以備行李又因國巫而祖其行曰神兮神兮
有聰明正直之謂無形氣聲臭之尋而今以我 聖
上首尾證候言之則斑脹膿靨靡有失期其始也光
明如點砂其起也磊落如弄珠繼之以蠟蒼蒂紫有
非人力所能及則烏得不曰微惠於神獲福於神哉
然則凡我一國含生之倫所欲報德於神者其何如
也導之以靈飈殿之以祥霓上可以窮蒼落下可以
達九地東至于扶桑之東西至于咸池之西北而窮
髮南而交趾惟神所行惟神所止而若我 聖上體

乾好生之德則凡我環域嬰孩百千萬億之有生者
舉蒙我 聖上翌瘳之餘慶是乃神所貺也神兮神
兮其將世世而不敢忘神兮神兮聽之無斃

原任直提學左議政李公 存秀 內閣祭文

國有輔相其望在民名俱身全號稱完人疇克兼之
卽古大臣繫公成就世罕並倫曰才與識器藏於身
橛楠挺美圭璋琢珍儉而無華家範式遵事物忘懷
一室凝塵進思盡忠端笏垂紳君子秉剛罔或緇磷
異口同聲咸期軸甸金甌旣卜百度維新彼騎者箕
胡遽返真羹纔調殷春已輟秦生榮死哀均賦匪貧

雲石遺稿 卷十二
殄瘁之痛茫無涯津蹟公纘戎世德可陳爰初發軔
先王所掄蘭臺珥筆奎華掌綸爲聖代瑞如鳳若麟
迺奮績庸于宣于旬威豈有奪惠莫不臻歷試六職
允協僉詢財簿詞苑一嚮片鱗箴屨補袞每念楓宸
訐謨定命庶幾欽鄰泰喬不動彌重鼎茵天假以年
夙志自伸煌煌烏芾宛其隔晨閣奠遵故有淚盈巾

寧邊南門改建告由文

鐵城峨峨環三十里甲天下險永鞏西鄙粵自勝朝
排丹拒蒙孰增其隍繫我辛公配朱烏位層樓聳霄
路臨盤紆山覽周遭其下有門鑰之柝之豈侈于觀

陰雨攸資我徠作吏邑人競愬虹架旣圯翬飛將仆
迨今不修厥費當倍暫勞而逸盍圖罔廢木在於山
斧斤可入爾瓦我石工各有執庶幾不日成此經營
太守曰諾爰詢羣情涓吉趨功先禱于神牲醴孔潔
祝幣載陳不有毀破何以改爲靈維默佑降監在茲
匠不告瘁民靡興咨俾完巨役保障之宜

祭纛文

大纛翩翩如斗而圓肅將克伐司戎之權五刃三革
孰利孰堅玄武勾陳載後載前匪此莫導爰啓于先
軍讖所重自昔伊然維嶠有營控制南邊綢繆是宜

管轄攸專彼結者聲色浣毛卷壁壘觀瞻我威曷宣
敝而改爲於禮罔愆舍舊從新其祀則虔犧樽盈盈
鼉鼓淵淵庚金行令時亦應天乃憑乃依乃歆吉蠲
祐以韜戢永綏多年

祭外舅郡守金公文

嗚呼小子入公之館居然二十有四年名則翁婿恩
踰骨肉閱公之事知公之心宜莫如小子者而公之
歿也節三變月五改葬旣從於先域靈又返於故寢
終不以一卮之奠數行之文哭訣于紼翼未啓之前
是豈小子之衷素而竊惟公靈徊徨惻愴亦必有不

忍去者矣酒公所好也止酒公之治命也玄樞在室
丹旌在堂則儀容聲響之間彷彿若平昔陪奉而禮
之所像生也斯時也未敢以公之所戒反貽公靈之
憾又未敢不以公之所好及公之大歸也含哀茹恨
以至于今今焉祿事載訖祭儀孔備將神道以事之
乃敢揭宿釀操薄具綴辭而告之曰夫以古人之心
行古人之道未有不窮且阨於今之世而惟公宅心
以誠制行以方樂善疾惡出於天賦傾肝倒肺不恤
人言當官而處事則雖權貴而不撓與友而守約則
雖窮廢而不變語及時事悲咤慷慨愛君憂國之念

雲石遺稿 卷十二
溢於顏色世皆脂韋我獨鑿枘此公所以中歲蹭蹬
一斥不復者也公詞賦足以居上游楷篆足以名一
家而自視欲然惟恐人知遺落名場棲遲蔭路及夫
七載鄉廬野蔬甘於列鼎澤釣歡於分符人之視之
不堪其憂公乃自適委時順命絕意仕宦之塗卓然
流俗之外其所失得與夫忘廉喪恥日夜趨名利者
何如也以此而悲公之不遇其亦淺之知公也公實
有大恒若不足而宗族之人曰事親孝矣享先篤矣
郡邑之人曰律身嚴矣奉公勤矣鄉黨之人曰忠厚
長德不可以復覲而世之不與公好者聞公之訃亦

莫不咨嗟太息以爲古之人古之人小子由是而知
誠之感人者深而公之德不可尙已小子曾逮拜于
先大舅大憲公矣先大舅嘗執手從容曰君之外舅
抱終鮮之悲無長成之兒他日裨補吾恃君耳小子
年幼識昧雖不敢承當公之處窮今幾年所每念先
公之言竊自恨知遇之孤負也忽於前冬又被公泣
然而囑藐茲也此時公家有慶公體無恙而其言切
悲私獨憂之然何意大限已至衷曲自露也耶扶持
成立無往非後死之責中心藏之何日忘之而不食
之果天理較然幸而有辭於萬一亦惟公默佑是藉

耳嗚呼臘初覆酌之舉卽因顓蒙一言公乃幡然改之斷然行之譬如湍水之赴壑快鏗之剖節要下卽下無所碍滯是誠虛受之量不吝之勇也然曾未浹旬遽至斯境未敢知床茲之崇或由於此而小子之疑悔隱痛當復如何抑又思之死生在天脩短有命不容人力於其間則復初正終天所以成就之也豈敢以姑息之愛或不誠於君子之德哉公之生平企待卽小子之科名今小子僥倖一第庶慰公心而公已脩夜泉塗警欬冥漠牖迷導愚將於何地萬事靡逮惟有盈觴之淚嗚呼哀哉

祭仲氏牧使府君文

維歲次乙酉四月初六日癸亥卽我仲兄羅州府君啓劬之辰也前一日壬戌舍弟寅永謹具薄奠哭訣于靈筵曰嗚呼我生之初甚樂也父母在堂兄弟成列斑衣而長枕怡愉湛翁曾不知日月之可惜而自我失恃纔十年又成孤露舊愴新恫煢然靡依尙賴以爲命者惟我伯仲季在耳伯氏於仲氏長一齡我則少五齡其年不甚懸故孩提成立未或暫離悲歡榮悴所共備經其序兄弟也而愛則父子誼實朋友自以爲吾兄弟此樂無窮今我仲氏奄忽違背嗚呼

安知此生之所可樂者未及中道轉而爲無窮之慟耶我伯氏與我幸而相繼釋褐驟躋卿大夫之列而我仲氏雖屈蔭途亦著吏績十年之間屢典州牧世稱其盈盛此或爲造物者所忌不使之全其樂耶我伯季常家居仲氏多在於外每時節宴集昕夕從容之時引領望遠未嘗不悒悒不樂而仲氏近欲解官就閒曰離骨肉宦遠方朱墨之役徒勞形耳弟則曰兄年未老何用汲汲爲也蓋以團聚之期尙多餘日而今日之事所未敢料也壬午之夏與秋兄適處京而弟乃奉命北塞去年春兄自錦城捲還而弟又西

出會少析多睽而不合豈我弟兄之緣自來淺薄有關冥數而然耶兄之貞疾三十年所弟亦有膏肓其痛苦相類也疋羸相類也均之爲難醫之證而歲月旣久狃以爲常各以自爲慮者爲過也昨秋聞兄有襄陽試泉之行意謂效害固不可知而臨水登山亦足疏鬱以兄之新哭甥館故也及聞其歷覽楓嶽則又怡然曰吾兄此行名山有緣所獲不其多乎未幾而病報至始亦前日樣耳不以爲深憂忽自春初得一書輒加一證心慌神越按住不得而適蒙內召之命兼程省病病已不可爲矣吾聞仁者壽有陰德者

雲石遺稿 卷十二
壽稟性貞固者壽以我仲氏溫恭慈諒之心廉潔謙抑之行重之以爲善而不求知爲惠而不責報雖古長者不多讓焉而至於內蘊耿介操守甚堅非其義也非其道也刀鋸軒冕實有不可奪者是皆足以享有邵齡膺受遐福而竟不及不稱天之年則吾所聞者果非耶或理則然而氣數之變有不必然者耶兄自髫年出爲我季父嗣事季母有踰已出而每當季父之忌輒號慕隕絕以逮終身閨門之內侃侃如也兄弟姊妹親愛篤摯而至人情纖細處尤所致意故諸姊之言皆曰乃伯尙或有悠泛者而季則疎濶無

當其能綜詳曲盡無少遺忽者惟仲弟乎以是推之於家之僕御邑之吏民雖箠撻不廢而常有惻怛慈恤之並行者故罰亦無怨此皆倫理之內備而孚信之外格也性厭芬華清淨自持蕭然一室絕無塵雜衣服取其潔也不願人之文繡也飲食取其精也不願人之梁肉也几案器物取其有定處也不願人之雕鏤侈麗也自田宅聲色玩好技藝之類一切無經心者雖交遊過從未嘗數數也常曰凡今馳逐豈盡真情也哉吾自量無材能之可現者閉門息交庶或寡過於是不乎巷斷車轍門絕書幣座上無握手附耳

雲石遺稿 卷十二
之客殆有勝於隱居之澹泊禪定之枯槁人或謂度
近乎隘節至於苦而不恤也憤邪疾惡若將澆焉而
或有自服其非者亦不忍永絕也是以族黨親友之
深知我仲氏者莫不曰愷悌哉若人我先考常曰仲
也天姿近道若加之以學問其庶乎是豈無所本而
然哉嗚呼世所稱講學之儒文章之士亦多矣其能
有實心實行精白無僞無愧於暗室如我仲氏者乎
否弟自西還看護藥餌不過旬日忽一日笑謂曰汝
旣徑遞簿無欠乎我於羅尙備嫁女資汝則決不能
辦乃汝不及吾處也是猶平昔善謔之言也及姪兒

侍於側顧而麾之曰噫其不忍也此已自分其無幸
而問其有自危之心則猶曰吾豈以是病死哉欲以
慰兄與弟也仍又強問則惟以季父之宅兆不利未
克營緬爲恨嗚呼此後死之責也兄之病淹床茲首
尾五朔而無一日不衣服冠也至臯復之朝精爽運
用尙不少亂是豈怛化者所能也今之悠悠萬事無
過於成就我孤姪而若能如馬伏波之於嚴敦歸樂
李公之於陶菴先生則固幸矣以弟愚昧其何能萬
一於古人耶惟我仲氏積累而不食必有餘慶則此
可以徵諸後日也所可悲者吾伯季兩人從茲以往

不知餘生爲幾何而七情之所振觸感輒隨之比肩而坐惘然若挈右而提左也接武而行况乎其睠後而瞻前也雖欲如前日之團圓不可得也嗚呼至情無哀至哀無文今我之言豈爲文哉只有無盡之淚而已嗚呼哀哉

祭姪女李氏婦文

維歲次壬辰正月己酉朔二十八日丙子卽我亡姪女李氏婦再朞之前一日也其季父雲石老人爲文而哭之曰嗚呼爾何行之厚而祐之薄稟之豐而享之約父母舅姑諸叔諸姑之憐且哀而天意人事之

錯乃若是不可度爾生也最長於羣從簪珥之屬故猶及以孩穉嬉笑供我先人先祖妣繞膝之歡樂况爾外翁相國公之慈覆殆自出之所未有爾大舅華泉公之恩撫殆所嬌之所不若頻繁珍重宛然如前昨奈之何緣促而運薄鬼猜而神虐竟使爾抱崩城之慟而失終身之託于時維癸之春爾方自羅還洛遠郊握爾天光慘漠至今追想腸爲之爍繼我仲之奄違遂三從之靡着然而爾尙保一縷實不忍重憾於偏母之漸削嘉爾性之甚窮而不虧其婉弱悲爾命之甚畸而莫定其止泊又安知爾舅銜命遠涉毳

雲石遺稿 卷十二
幕我滯湖節跡似羈縛而爾之凶音若斯之遽愕歛
不能視其穉病不能視其藥又臨化如夢中酬酢乃
以爾舅與我之不得訣爲至切之慘雖死者冥昧不
可以復作而生者聞此烏得不摧落迨我北歸爾帷
已廓欲洩此恫只有一酌公私悲遑歲更三籥愴茲
撤筵奠菲辭畧嗚呼哀哉

祭姐夫郡守尹公慶烈文

自叔季降民鮮其德情匪中發貌以外飾淺智小辯
各驚詐力謂質爲鄙天理攸息惟公不然全我所得
豈忽緇磷乃絕畛域不雕者樸無華則寔孰競而噪

我訥如默寧失諸厚罔流于刻由此篤倫由此盡職
家無遺行可倣可則官有餘愛豈聲與色噫彼衰薄
在今疇克凡百故舊有懷沾臆昔公館我我猶能憶
我季末生安所知識餘五十年託心靡忒况與姊偕
祈在引翼左樽右棋匪耄之昃趨庭繞膝積以爲福
以穆姜賢晝哭何極惟謝於梅愴可能抑三霜云邁
如昨如翌南園之樹時露惻惻載斟我酒載饋我食
靈其或沫我誠不泐

祭始祖侍中公墓文

顯顯我祖氏貫之初厥初韜光石窟攸廬草昧旁求

雲石遺稿 卷十二
巨跡偉如廼際風雲麗祖後車龍攀鳳附莘耕磻漁
壁上三韓金匱丹書申裴卜庾寂功疇居國史雖闕
家譜罔疎積慶流德綿九百餘凡今雲仍咸藉菑畚
末孫眇眇亦忝得與永念尊厚匪先庇歎恩服來掃
露濡日舒衣履之藏靈秀所儲暫毀旋築古記不虛
梵宮有護尙瞻遺墟旣載清酒兼陳嘉蔬曷云展誠
端肅衣裾

祭十四代祖妣固城李氏墓文

我十四代維淮陽公麗衰邁眊韜名而終曾契 恭
定與殷盤同恩錫塚戶崇德報功瞻彼嘉林尙有幽

宮爰稽配位女士之風鐵城名閼考曰杏翁云胡祔
禮載西載東蔭雖及裔享不在躬末孫來奠庶監微
衷

祭十三代祖佐郎公墓文

我朝我系自我祖始簪組雲仍綿五百禩宗如礪翁
實期福履匪累與積曷以致此所莫之徵生歿仕止
而耕而埋有譜如史維配曰許河陽之氏爰封四尺
永陪天只眇茲末孫靡有續似清酒在罍庶慰詹企
祭叔姊氏淑人文

維歲次壬寅十一月朔日家弟寅永謹以菲薄之奠

哭告于叔姊氏淑人之靈曰嗚呼我同胞四姊二兄
並我爲七人嫁娶旣畢男女倍之于時也王母無恙
兩親俱在晨昏起居時節聚會簪珥冠巾羅列左右
荷福蔭於含飴供歡笑於弄雛不知日月之不留風
樹之無情矣繼而尙右割半存者無幾是固後死之
哀而我仲叔兩姊氏皆踰七旬精力尙康旺我伯氏
未至甚衰弟最善病亦能自力故每當兩姊氏來臨
也姊男四人老白首相對依伯氏如父依兩姊氏如
母餘生爲命惟在於斯孰謂我叔姊氏又先違背三
霜已屆筵几將撤乎我姊氏容儀之端莊性質之溫

粹德度之淑哲才識之通朗卽族黨姻親婦女老少
之所共覩所共言而昔我王考之烏謫也姊氏從我
王母往侍焉王考歿姊氏甫十歲凡襁衾之具餽粥
之供靡不躬檢使喪無違節而王母崩圻中寔賴焉
其夙就有如此者及歸尹門舅姑之宜之常事也三
十以後始過房於季舅梧下公公嚴舅也夫人繼配
也獨於媳婦之言與行是嘉是悅家庭之內終始無
纖毫間隔其至誠有如此者夫子性和厚喜與賓客
飲雖甚饗未嘗乏下酒物以違夫子濟窮恤貧如恐
不及至素不知困迫處亦極力周旋有古急難之風

雲石遺稿 卷十二
故舉九族結裙者莫不師服而傅姆婢妾之類愛戴如幼哺之於親母有小姑歿而遺穉女者撫而養之踰於親生諸孫兒不敢與比病革也顧而歎曰不能見此兒成立是恨也言不及身後事其篤行有如此者弟之伯季厚蒙恩寵迭居將相亦多年所不以一私相囑而所勉者戒慎兢懼而已姊氏好覽故事於治亂得失賢邪是非博悉洞達有宿儒讀書者所未逮故弟等遇朝廷大事多仰質焉是以親舅兩家每疑者能析之惑者能解之拂逆者能調劑之隘滯者能開廣之單辭片言不費聲色而自然使聽之者心

平氣和不能不自屈由其至明剴而至懇惻也至大義所係有毅然不可奪者其示億也長甥適赴任所寓次甥家以便醫藥易簣前一日忽命侍者曰必遷我於吾室侍者不敢不從其意在正終也是豈季世婦人所辦哉當於古列女傳中求其芳徽柔範之彷彿而自我叔姊氏長逝之後我仲姊氏不欲數臨於弟家或強而臨之俛俛焉無與爲伴憾憾焉無與爲言未肯爲多日淹而弟亦不能挽之也嗚呼英公之粥不可以並煮女嬃之詈不可以兼承悠悠此世辭有盡而悲無窮矣

祭仲姊氏淑人文

維歲次甲辰八月乙未朔十二日丙午家弟寅永謹
以菲薄之奠哭告于仲姊氏淑人之靈曰嗚呼哀哉
竊想天下之鮮民莫有甚於父母之晚生兄弟姊妹
之最居季也方其父母俱在兄弟姊妹無故之時爲
晚生與最居季者只知有幼少承歡之爲樂而不知
有竟爲鮮民也向年叔姊之歿也尙有以自慰自賴
者特以姊氏巋然如靈光獨存庇覆於我顧恤於我
耳今將於何而有所養於何而得其嘗乎嗚呼哀哉
如弟者旣不能久奉父母又於兄弟姊妹之間屢閱

疚憾今惟有伯氏與弟耳白首殘生形影相依語頡
頤提挈之舊而涕先零顧疾病羸癯之私而心先冷
嗚呼此豈非天下之鮮民乎惟我姊氏克勤克儉克
敬克謹奉大宗而罔恫事夫子而無違雖窮通有時
而不失其守哀樂互乘而以理爲順此皆聽於舅門
諸人而又弟輩之所覩記也由是之故尊之久而德
益邵積之厚而福益隆迨乎含飴之弄養及專城補
黑之愛榮至珥筆而晚年之怡悅極矣歷數人世婦
人生命夫何有餘憾者存况又玄室之卜卽我姊氏
幾年供奉之所禮當合封神理斯協而最不能堪耐

哀腸揆遣歲月者卽弟兄弟也我姊氏知命觀化之
衷必無有係戀於子女孫曾之列而其所倦顧徘徊
而不忍訣吾兄弟也豈不悲哉

祭從子判書秉龜文

維歲次乙巳十二月戊子朔十八日乙巳季父雲石
老人以隻鷄卮酒之奠哭訣于亾從子吏曹判書文
肅公之靈曰嗚呼哀哉死者人之常也脩短有命數
豐嗇有稟賦順命盡稟謂常也宜而汝之死也有必
不可死之義決不忍死之情則其常乎其不常乎堂
有七耄病父家無一尺遺孤上而 慈聖同氣之憾

下而弱弟割半之慟其可死乎其忍死乎猶父猶子
之幽明結轡不與焉吾雖萬萬不及古人恒所企望
於汝者非漢傳之受晉保之玄柳京兆之仲郢呂文
穆之夷簡乎俄忽之頃事迺大謬獨使我乃效昌黎
祭十二郎文則死而有知可乎忍乎昌黎之文無限
悽切世稱絕調而事理情意與我恰似雖仍其全篇
而侑之無所不可抑有似同而實不同者以我今日
較之昌黎其事益悽其情益切吾將如何而洩其悲
也其文曰年未四十視茫茫而髮蒼蒼恐朝暮死而
汝抱無涯之憾孰謂少者歿而長者存强者夭而病

雲石遺稿 卷十二
者全乎又曰吾兄之盛德而天其嗣乎又曰汝之子始十歲汝女待其嫁又曰吾行負神明而使汝天使我告汝豈有加於此哉然而實有大不同者存吾年已近七十一生又抱貞疾拭巾俟符朝暮之事則豈與年未四十視茫茫而髮蒼蒼者同乎吾兄之盛德經歲床第視辨起動舉皆須人而遽遭此至慘至悞逆理之境豈與吾兄之盛德而天其嗣同乎汝不但無子而已並與女子而無之吾父祖四時之祭今無主者豈與汝之子始十歲汝女待其嫁同乎吾以不肖無狀偏蒙 三聖王天地之德歷遍內外位極三

階而無一補效徒尸素耳其積咎招殃不在於我而及於汝豈與行負神明而使汝天同乎吾之腸摧胃塞冤恨彌中者有不當以昌黎祭十二郎比論之也汝固跡在肺腑任兼宮府其秩正卿也其位天官也縮金穀而備干城掌詞命而奉謨謀殫誠竭智精力俱耗而死歟暴疾而死亦多矣未嘗聞如汝之恍惚急遽疑信莫定者也汝於當日公退來吾室與吾言乘昏而歸晏如平常一毫無幾微色而片刻之頃急報忽至顛倒往視已無及矣此果命耶稟耶真耶假耶至今三十有餘日吾尚寢不能交睫食不能下咽

書不遺稿 卷十一
晝思夜思不得其說蔽一言曰門闌至盛福過而災
生也孽由我作奈如之何但我 聖上隱卒之教至
懇至惻至以乃心王室褒之汝於九原之下抱此華
袞庶可以瞑目也昌黎於十二郎未嘗有品藻言行
之辭者以至親無文也吾於汝亦云嗚呼哀哉

祭伯氏忠敬公府君文

維歲次丙午十一月壬午朔二十七日戊申弟領中
樞府事寅永謹以菲薄之奠哭訣于先兄石厓先生
之靈曰嗚呼哀哉天胡使我至於此極也呼號而訴
之已無及矣吞飲而抑之又不能也從前喪威之荐

疊未暇論已往年哭二姊氏去年哭長從子未周歲
又哭我伯氏隻影子子無地依賴雖不知酷罰釁孽
何所致此而弟固彝性中物耳與木石無知者稍有
間焉則以情以理安得不崩裂摧滅而自伯氏大歸
之後旬朔屢嬪視息苟延吁可恠也雖然弟亦老白
首矣肝肺盡消疾病常痼極知與伯氏頡頏於泉下
無幾何間而此生此世一日爲苦天胡使我至於此
極也凡今外內族黨小大親友莫不曰夔也煢然在
疚駿也慟如失怙主祀未立將以顯兄爲題此禮家
罕有之事也烏可不制之忍之自慰自譬用定我宗

雲石遺稿 卷十二
孫然後庶可爲後死之責歸拜之顏此言亦然矣此勢未必然也伯氏常以弟先於兄爲隱憂安知今日反以兄弟順理爲至痛也哉我伯氏年開八耄可謂壽矣祿致千鍾可謂富矣自少至老體康而心寧未曾有疾苦憂患而攸好德三字卽舉一世共公之論今又考終于寢則古所謂五福之能事畢矣矧乎承箕裘之令緒託肺腑之懿親位極人臣勲在王室而三聖之隆禮 慈殿之至孝歷數千古所未能遭逢者人生之榮夫復何憾第以天理言之旣厚其始當完其終以酬其積仁累善純孝篤忠之至誠而末年

一疾綿延三載終不見醫藥之效重之以西河之憾竟至斯境豈閭浮人事本自缺陷不可以理而挽回也耶弟於伯氏差六年矣六十年以來之經閱皆歷如昨日悲歡共之好惡共之窮達共之朝廷之上家室之間無巨無細未有不相共者此兄弟而父子也師生而朋友也伯氏何以捨弟而先逝弟何以捐伯氏而久視乎幽明之際不能無愴然而傷心者矣吾兄弟孤露之後幸得次第釋褐而邇來子姪亦皆趾武顯耀隆赫三十年所盈虧滿損卽理之常夫何怨天尤人而所可哀者卽弟也天胡使我至於此極

也先伯嫂緬事纔訖撫昔之悲采切于懷而但與亡妻之墓松楸相連異日吾兄弟魂魄亦當相依如比鄰來往况今年運克符合封已涓是爲不幸中幸也至於我 殿下隱卒之教親撰之文足以有光百世弟何敢更贊一辭以犯至哀無文之嫌乎唯是言不知裁敘情而已嗚呼哀哉

碑銘

恩彥君神道碑銘

并序

昔我 宣祖大王由旁支紹大統追尊本生親曰德興大院君曰 河東府大夫人禮度精微品式隆

備今我 聖上踐阼之舉卽 宣廟舊禮也我 大王大妃殿下以 殿下追隆本生之義贈本生親全溪大院君推以上滂于 恩彥君諱裊完山李氏卽 莊獻世子之第二子 英宗大王之孫 正宗大王之弟也妣良娣扶安林氏惟我 大王大妃殿下暨我 主上殿下以 恩彥君墓雖石儀之工已訖而尙無顯刻之文命臣寅永撰之臣惶懼不敢以老病辭謹按狀曰公以 英宗甲戌生六歲就外傳九歲封始爵十一歲定君號十二歲行冠禮十四歲聘常山郡夫人鎮川宋氏參奉樂休之女也官至都

雲石遺稿 卷十二
摠府都摠管階至顯祿大夫此公大畧也辛卯春與弟恩信君同謫于濟州三月而恩信君病卒公特蒙恩宥而歸居二年癸巳秋又因 聖教還入本第甲午夏特敘丙申三月差 元陵守陵官戊戌有甄復之教已亥秋又聘全山郡夫人全州李氏幼學德喜之女也自島謫以來恭儉謹慎居無僣屬出簡徒御一以律已飭躬爲度家道整飭不令而嚴奴僕夜不入中門宮屬不得與宮人相近宮人親戚亦禁其往來由是宮中清靜焉常曰吾近屬之一無識者耳歷代史書覽之何益萱闈定省之暇退坐外堂只讀小

學或至終日不輟一念敬天於所見處不踞床不吸烟此公篤孝慎獨之工也至自奉也尤爲簡淡衣用綿布早饍必進夕餘饌不求佳品凡菜蔬之萌芽者禽畜之聞其聲者皆不進也尤以忠孝爲教誨子弟之本及丙午又謫于江華公於是泣辭于慈堂孳眷寓島每仰頌恩造而感歎曰 主上昊天之大德友愛之至誠雖至死糜碎何以仰答其萬一也每當六月 惠慶宮誕辰九月 大殿誕辰輒望闕行禮十五載如一日及庚申崩坼之變號天擗踊曰吾餘生至慟惟願追陪我 兄王仙馭矣每一號哭傍人不

忍聞也及辛酉六月三十日卒逝于謫舍享年四十
有八葬于揚州津寬神穴面酉坐之原常山郡夫人
以英宗癸酉生辛酉三月十七日卒祔葬于公之
墓右全山郡夫人以甲申生已卯六月初四日卒葬
于通津馬松里子坐之原凡生五男一女長常溪君
湛二男昌順三男昌德皆早卒四男豐溪君塘五男
全溪大院君諱璜女適參奉韓覺新常溪君無后豐
溪君生益平君曩全溪大院君生三男長元慶早
卒次永平君昱第三男寔我主上殿下也豈非天
所佑哉銘曰

憲憲 恩彥近屬璜源 顯園之子 元陵之孫
元顯繼德永毓本支綿延百年序又在茲我王受
之起自舊勞渭橋冠里漢業增高 太母所簡萬姓
攸同苟滂其本繫誰之功積累既多必熾而昌於千
萬歲爲邦家光

南原殉義碑銘 并序

萬曆丁酉八月倭再入寇賊會義智行長義弘等糾
十數萬兵圍南原六日而城陷死者五千餘人天將
李公新芳蔣公表毛公承先以副摠兵楊元標下死
之配食於府之誕報廟而我死事者節度使忠壯李

雲石遺稿 卷十二
公福男接伴使忠毅鄭公期遠知府忠簡任公鉉俱
贈議政府左贊成而鄭公又以乞師之勞策宣武勲
追封萊城君助防將 贈漢城府判尹金公敬老守
禦將 贈刑曹判書武壯申公浩通判李公德恢求
禮監李公元春俱 贈兵曹參議與義士吳公興業
建祠享之寵其額曰忠烈朴君起和監戎庫而自焚
者也孫姓而逸其名者李公元春知印也雖幸而免
終始隨公其義同於死故附別廡云至若防禦使
贈兵曹判書吳公應鼎及其子武科 贈戶曹佐郎
穢興德監 贈兵曹參判李公容濟問安使吳公應

井參奉黃公大中都事鄭公敏得吳公興業之弟義
士胤業邢義士璉縣監 贈吏曹參判馬公應芳亦
同時死見邑誌與諸家記述而不得列於俎豆者缺
典也况湮沒不稱者又可旣哉倭自構兵以來蕩覆
我三京蹂躪我七路而終不敢窺湖南者以梨峙之
捷晉陽之守海上舟師之遏其要也及封貢事敗尤
蓄憤於湖南而南原爲之衝於是提督麻貴住王城
調遼兵三千配楊元鎮之遊擊陳愚衷屯全州爲其
繼而朝廷以臣浩屢於海戰破倭命會七邑之師備
蛟龍山城城古帶方墟也距府近稱絕險元謂府城

卽駱將軍尙志所補築其堅足守不當以山城攜之
因增陴浚溝樓櫓甫完而賊抵境蓋以詭計間我統
制使李公舜臣去之其代元均也遂喪師于閑山賊
長驅莫敢禦元輕騎至宿星嶺覘兵勢急檄我諸將
入保臣福男方扼蟾津會臣應鼎揀銳卒五百赴之
遇臣敬老自全州募壯士林士美等來以死誓合軍
踰飛鴻嶺圍合矣令曰敢退者斬爲魚貫之陣鼓而
進賊辟易不能逼城中人歡聲如雷元拜曰節使以
孤軍決重圍豈非南朝一李侍郎乎臣浩等以次入
元與中軍新芳在東門蔣千摠在南門毛千摠在西

門而北門則臣福男當之圍拒日屢合殺傷互當然
守陴者不能賊十之一勢益蹙而游擊愚衷懦不敢
救賊覷之脅元出元陽拒之潛爲遁計一城洵懼賊
乘其懼也擁萬砲急攻搬草填壕頃刻齊於城踰之
入南門潰天兵不能支向西走爭門而出賊於城外
編木束刃夾路而列圍奮長刀斫之時夜旣望月明
如晝駢首受戮無得脫者元聚羣馬鞭而先觸刃輒
踣然後躍騎過之騎疲則超他騎捷於飛鳥賊追不
及或云故縱之也 天朝以師律斬傳九邊棍愚衷
充軍臣福男臣應鼎臣穢赴火死臣期遠臣鉉具朝

雲石遺稿 卷十二
衣北面四拜而死臣應井臣大中中丸死臣敬老等
力戰死嘗聞之楊元驍將也東援之初著績尤多斬
普通之關斫碧蹄之圍跳盪無前易倭而不設備惟
縱酒爲樂鄭公與吳公應鼎力糾之不聽及賊日盛
外援不至其勇無所施世稱元善野戰守城非所長
信矣城且危又要鄭公避之鄭公曰天將爲小邦守
危城陪臣敢先逃以爲民望元不能強其欲棄城也
任公始以文武材選爲守及是曰此湖嶺之要也失
此則其勢莫遏且公受 天子命寧忍爲獨脫計也
李公德恢舉大義責之而李公容濟肆水師治戰艦

承檄而至以不守蛟龍之險爲失策元亦歎服云外
史氏曰古人云城存與存城亡與亡卽爲有守城之
責而言也若南原之役備禦節制一出於楊元我帥
臣以下聽命焉耳雖師徒撓敗城池失陷其責在於
元不在於我則姑勿死以爲後圖亦可也乃北首爭
死無一人欲苟活夫豈但以與城存亡者論也始塘
村黃公暉鄉之賢大夫也嘗輯諸公殉國之烈爲一
書未及卒藁其五代孫再洙追成其先志刊行于世
而尙有所闕漏者士議惜之今崔君宜澤崔君崑等
更加蒐採欲樹大刻以徵諸後因黃君爲介請文於

不佞不佞曾過是府見地勢曠夷易以受敵深有感於李公容濟之言徘徊眺望者久又於諸君子事益歎其尚忠慕義之無窮也乃敢不辭而銘之銘曰昔倭再搶勢甚龍蛇 帝更援東厥督西麻迺籌賊路爰布王徒龍城額額控嶺扼湖疇當是任則楊摠兵負勇如虓視強猶嬰我之禦夷莫利于海海既與尸陸復瓦解我之禦夷莫利于山棄險而野計失當關矧絕蟻虬奈逞蛇豕將軍潰圍士卒罔恃桓桓摠標皆朔方健拋裂茅志齋裹革恨嗟我英靈祇以死決仗鉞投燄整笏嘆血師匪失律儻異從戎苟不素

蓄曷捨其躬知府特揀文武之良有母不淚曰於吾光惟金與申暨三李公韜鈴挺豪板蕩標忠或以子俱或與兄僅或褒而享或漏於 贈顯晦何論其義則一彼皦然者有星有日蓼川不竭麟峰不隳諸公之風萬世永垂

靈圭大師殉義碑銘 并序

奮干戈以護邦國曰勇冒鋒鏑以委原野曰烈具斯二者又得其義之正曰忠若是者洵我名教中人難能也而可得之於祝髮被緇外倫理而淪空寂者乎此騎虛堂靈圭大師卓然獨尊於叢林而若古忠臣

雲石遺稿 卷十二
顏常山張睢陽輩視諸師常事也師俗姓朴氏密陽人西山大師高足也常住公州之青蓮庵有神力好以禪杖演武技及烏夷之變 聖駕播越師憤甚三日哭自薦爲將州牧許瑱壯而許之乃糾義僧數百人與防禦諸將擊清州倭官軍潰師獨與賊掬義兵將趙文烈公憲馳赴之聯營壓州西門倭大劔宵遁趙公將進擊錦山倭師諫不從師曰不可使趙公獨死因偕焉抵郡十里會天雨壘未立師曰兵有備無患姑徐乎趙公曰此賊非我能敵我徒以忠義激士心欲乘其銳也翌曉賊來薄我師無後繼趙公死之

或曰賊驟至盍去諸師喝曰死耳豈可生鬪益疾亦死寔萬曆壬辰八月十有八日也嗚呼師之得趙公死固幸于趙公又益有光矣朝家念師死王事不用浮屠法茶毗之葬如禮盖柳山有圭師塚云竊聞佛以正法眼傳付之後閱累世至達摩西來始闡微旨法嗣古德不啻如阿僧祇恒河沙而類皆說心說性求其道於幽眇恍惚之地其下焉者不過因果之幻緣募之末耳歷考內典諸品傳燈所錄烏有所謂勇而烈而忠如師者否乎雖以師謂之名教中最難能人可也然其倡義旅者慈悲也摧強敵者勇猛也勝

雲石遺稿 卷十二
而慮其敗者智慧也知必死而不忍獨生者善信也
存百世之綱捐七尺之命者割捨也能辦此苦行者
覺悟也能成此妙諦者解脫也具足之相自在真如
之體不壞則卽此是佛卽此是無上菩提也彼小乘
之聲香以爲障戒律以爲拘者曷足與議也郡有從
容祠享趙公配以師後二百有餘年 當宁乙未有
法徒大仁者建閣于郡南進善山之西麓以師真影
妥之扁曰毅禪將伐石以志之此又以香火供養之
也主其事者邑守趙侯寂永而仁禪以余爲趙侯堂
從繭足抵都門介以請文余嘉其慕義之誠遂爲之

銘曰

嗟一切衆生不了死生原金棺非真詮蓮華非妙言
我聞摩訶薩實實現世尊有四恩當報佛恩亦君恩
師惟乘震土偉器蘊夙根摩頂參古宿西山卽祇園
發誓救倒懸是謂孟蘭盆人天慟白乳蟒蛇竟迷昏
圓光旣不滅法身引香幡莊嚴有七寶永鎮不二門

紀功祠碑銘

并序

惟 上七年辛丑秋謁 西陵路出高陽領議政臣
寅永言故元帥臣權慄幸州破倭事仍言是年乃
宣廟勩勲之年而幸州爲高陽地今與衛所由適在

雲石遺稿 卷十一
是年是地請建祠以旌武功 上可之於是三營帥
臣奉命董工明年春祠成額曰紀功蓋公肇有俎豆
所也始幕府諸人建碑于此卽崔簡易豈之文韓石
峰濩之書仙源金相國尙容之篆也追記出於公之
婿白沙李相國恒福而書之者金南憲玄成也字刑
不可辨公之後孫縝甫與諸宗謀改之要寅永識其
槩寅永眇末也何敢以文字附簡易白沙諸公後哉
雖然亦有舊碑所未錄者其策勲也公居一等 贈
效忠仗義迪毅協力宣武功臣議政府領議政永嘉
府院君其議諡也屢改爲忠莊其立嗣也取仲氏子

益慶過房 仁廟丁丑以監察殉于沁今 上甲辰
贈左承旨其建祠也任其事者李侍郎啓朝外裔也
權侍郎大肯旁派也李尙書惟秀忠武公舜臣後時
元戎也且如湖南軍善射射必中矢將盡水使李蕢
舟載箭以繼之云者載 國朝寶鑑以孤軍近大敵
不可無柵役諸軍作柵衆志大固云者爲豐壤君趙
公倣事載其神道碑趙公公中軍也又記寅永王考
文翼公使日本日本人輒問公與李忠武之後曰龍
蛇之役日本兵將皆殲於二公至于今以二公名驅
瘡癘而嚇兒啼及歸奏之 英廟大嗟異命錄祀孫

皆可書也遂系之以銘曰
粵古東方號莫強國維乙與邯維武之力 聖朝尙
文金火迭革載崧載橐道崇而極有闖者夷封豕脩
鯨躡我八區蕩我三京列鎮吳潰莫之敢嬰天步方
窘寤寐于城於赫權公起自南牧黎峙小試先折距
角迺昇旌纛迺按全服迺誓北勤後出者戮由稷移
禿解佩以命賊挑彌堅截掠勤進畿旣斂熾灣無壅
令仗義則壯矧謀制勝中分衿陣帥宣作殿躬統前
部爲士卒先陽江擊楫直逼郊甸屹彼幸山匪守伊
戰時 明天子憫我乞靈督臣東出如雷如霆遂藉

沮績其勢建旆碧蹄狃勝聯絡失形賊且羣萃凶焰
孔張欺我寡援恣厥陸梁踢倒翦滅計在逞狂衆寡
之懸一着存亡公時整暇不撓以懾鍛矛礪刃治軍
益急後背大江是置死法幕府屈策環柵乃立俄有
斥報兵不見際穴礮束炬攻者悉銳吹唇匝地非累
萬計百道以登前踣後繼隻手仗劍罔忽自勵士皆
殊死烟噴血灑一可當百由先據隘從卯至酉三合
三敗湖鍊注隊命疏及遠箭匱船給亦賴良闔我擣
我批我鉤我積彼挫莫支焚屍而遁臨陣獲首百以
算級自倭之燹始有斯捷遑遽南走救猶靡給名姓

必問聲威攸及爰暨天將朝暮注想石奏請功宋咨
論賞 帝遣行人華袞隆獎王用三錫師中筮丈蹟
茲偉烈卽古敵愾滂麗以上疇與爲對國將中興天
以公賚允文允武安危是佩鼓鞶旂常百世匪逃紀
功之祠戰地歷歷山靜波晏伊誰云錫后王萬年罔
我有敵

麟蹄陶菴李先生絳遺墟碑

士大夫當辛壬之禍難乎免矣雖免亦難乎得其正
矣惟陶菴李先生以早退免及叔父忠肅公瘐而歿
奉母夫人遯麟蹄之峽閱四載爲乙巳更化而先生

反于郊猶以君誣未辨竟不爲 嗣聖出自是朝局
屢變忠逆相混者三十有餘年若先生出處之正固
辛壬完人而凡所以應乎變者一裁之以義禍自不
及此易之以時義爲貴也在易之繫曰君子見幾而
作卽先生早退者也坤之文言曰天地閉賢人隱卽
先生遐遜者也无妄之象曰其匪正有眚不利有攸
往卽先生竟不出者也竊以是證之於辛壬前後則
譬鑑照符契無待乎象與占而易之用備焉嗚呼媿
哉始先生寓德山村明年移邑東上道村構一小菴
扁一最地有伏龍飛鳳諸山而邑以麟名惟龜缺焉

人之最靈可當其一也仍時花種菜供母夫人歡夫
人手自摘茄先生携筐而隨之以爲樂時忠肅公筵
几在春川月再赴奠每踰嶺折樹爲杖旣度植之路
久而成列其杖屨所及縣之雪嶽春之清平山云今
其遺礎宛然鄉人士尙爲之仰止也年前趙侯箕淳
監是縣議以短碑識之大冢宰李公光正先生曾孫
也按東闌伐石而未及刻嘗以記蹟者屬之余余亦
荏苒數年終不敢辭謹書其槩如右先生諱絳字熙
卿牛峰人文科官四宰文衡諡文正公享于龍仁寒
泉書院至倡學傳道之所造詣非末學所敢論也

尙德祠碑陰記

尙德祠在營城東里許其號尤菴宋先生時烈命也
其額竹泉金公鎮圭書也其祀故觀察使李公諱翮
故觀察使俞公諱拓基並享之所也始 顯廟辛亥
全嶺饑命李公以節治之廩補稅蠲躬莅賑事流散
者旣集然後設養老之讌肄鄉射之禮申之以詩書
學校使一路丕變民爲圖形而生祀之後因輿論凡
儀式如書院焉俞公之按節當 英廟丙午丁未之
間興儒化剔民瘼調恤撫摩之政與李公匹美而舊
以佃夫斂雉鷄供營府者悉除之捐萬金置田應其

役民到今莫不被賜越十一年復膺前命髫白胥悅
不煩施爲歷數近古治行指無先公屈者及 正廟
戊戌以公像追奉之爲其德於嶺一也謹按李公之
先公諱有謙嘗爲知府俞公之先大公諱檄先公諱
命岳亦嘗爲道伯與府判咸有異績於此而二公式
克承之又從而推廣之故而民習焉德之也深詩曰
世德作求傳曰必世而後仁信哉且是營有營主題
名記自麗文宗三十三年都部署使李齊元始可考
而在麗得五百一十有六人入本朝今爲四百有餘
人此其中能善其職惠澤加於民者亦多矣獨於二

公俎豆之其遺風餘韻藹然有不忍忘者豈智力襲
而取之哉其必有真實無僞之所孚感也嗚呼百世
在前千世在後後之任藩宣者觀於此尙德之祠亦
足以自勵矣俞公會孫長柱方宰安義開寧宰洪君
穉圭爲外玄孫而寅永亦忝彌甥適聚同省謁于祠
謀所以紀其實推寅永文之書與篆分屬之兩使君
從民志也李公字仲羽號逸休堂諡忠憲牛峰人俞
公字展甫號知守齋諡文翼杞溪人二公並位台司
功業在王室而此畧之者以嶺績爲重云

墓碣

十四代祖妣固城李氏墓碣

此高麗奉常大夫淮陽府使豐壤趙公諱慎夫人固城李氏之墓也父高麗門下侍中號杏村諱岳恭愍之際以名德著祖判三司瑀曾祖判密直司事尊庇外祖右代言南陽洪承緒有二男二女男長安平工曹佐郎墓在夫人墓之上次司饗寺正開平女適崔希慶中郎將柳仲宜佐郎六男三女男長謙之正郎贈掌令次重之次順之參奉次厚之過房於季父次溫之縣令 贈兵參漢山君次恭之進士女適縣監韓讓縣監柳庸之兵使金淑饗正系男卽厚之將仕

郎謙之男益脩兵使益永主簿益長縣監重之男益確主簿順之男益疆司直益健護軍益精進士武科溫之男益貞吏參漢平君厚之男益祚別檢益禧虞候益祥副司直 贈掌令益祐都事玄孫以下京外散居者可以千數又名位多顯達不得盡書書其秩正卿以上曰尙綱吏判 贈領相景獻公璪吏判肅憲公曦吏判 贈贊成文翼公瑛禮判孝貞公璪右相忠定公鎮寬吏判 贈領相孝文公得永吏判文忠公鐘永吏判忠簡公萬永領敦寧豐恩府院君贈領相忠敬公誕 孝裕獻聖宣敬王大妃殿下

翼宗大王之妃 憲宗大王之母妃也冀永今判書
寅永領相秉鉉吏判秉龜吏判文肅公秉駿今判書
漢平君派也曰珩禮判 贈領相忠貞公相愚右相
孝憲公最壽知敦寧錫命判敦寧遠命判敦寧貞簡
公文命左相豐陵府院君 贈領相文忠公誕 孝
純王后 真宗大王之妃也顯命領相豐原府院君
忠孝公時敏知中樞載浩右相時俊吏判尙鎮吏判
翼貞公鼎鎮戶判弘鎮刑判容和刑判副司直派也
淮陽公初諱思廉有兄曰思恭官尙書謀誅辛旽不
克而死公與季氏僉知公祚皆變名而逃禍公居湖

西之林川郡至麗末歿葬本郡德林洞我 太宗大
王以甘盤舊契給守塚戶始佐郎公移住于春川昭
陽江也夫人或從子而終遂各寔也歟夫人以名家
女其懿範垂後者必多今無徵焉惟後承繁昌可追
其本也墓舊有表無陰記諸宗合議將樹之碣只錄
其系闕子孫如右云淮陽公考諱炎暉密直司右副
代言祖諱季鵠刑部郎中曾祖諱晶監察院掌令高
麗開國功臣門下侍中諱孟之後妣密陽孫氏式目
錄事元桂女也

十三代祖工曹佐郎府君墓碣

雲石遺稿 卷十一
府君諱安平姓趙氏貫豐壤始祖諱孟高麗開國功臣官門下侍中後孫有諱之藺天和寺殿直自侍中公至殿直公系失傳自殿直公四傳而爲刑部郎中諱季鵠生諱炎暉密直司右副代言生諱慎淮陽府使 贈司僕寺正卽府君考以上三世也府君官至承議郎工曹佐郎 贈通政大夫兵曹參議以孫漢平君益貞推恩也忌八月六日葬春川府東五里艾幕洞癸坐原配 贈淑夫人河陽許氏祔焉開城府尹貴龍女忌九月二十一日有六男三女長正郎贈掌令謙之次重之次參奉順之次將仕郎厚之過

房於季氏司饗寺正開平次縣令 贈漢山君溫之次進士恭之女適縣監韓讓縣監柳庸之兵使金淑孫益脩兵使益永主簿益長縣監女柳轂文牧使安孝康舍人朴精文科長房出益確主簿二房出益疆司直益健護軍益精進士武科三房出益祚別檢益禧虞候益祥副司直 贈掌令益祐都事女丘致崑大憲鄭祚生員金軸縣令四房出益貞吏參漢平君女李公淳府使宋傑郡守李汾陽察訪五房出曾玄以下益繁昌多顯達不能盡記只書秩正二品以上珩禮判 贈領相忠貞公六代孫也相愚右相孝憲

雲石遺稿 卷十二
公七代孫也最壽知敦寧八代孫也錫命判敦寧遠
命判敦寧貞簡公文命左相豐陵府院君 贈領相
文忠公誕 孝純王后 真宗大王妃也顯命領相
豐原府院君忠孝公九代孫也尙綱吏判 贈領相
景獻公時敏知中樞載浩右相時俊吏判十代孫也
暉吏判肅憲公暉吏判 贈贊成文翼公瑗禮判孝
貞公暉右相忠定公尙鎮吏判翼貞公鼎鎮戶判弘
鎮刑判十一代孫也鎮寬吏判 贈領相孝文公十
二代孫也得永吏判文忠公鐘永吏判忠簡公萬永
領敦寧豐恩府院君 贈領相忠敬公誕 孝裕獻

聖宣敬王大妃殿下 翼宗大王之妃 憲宗大王
之母妃也冀永今判書寅永領相容和刑判十三代
孫也秉鉉吏判秉龜吏判文肅公秉駿今判書十四
代孫也按譜曰府君以義盈奉事出宰砥平因卜居
於春川昭陽江上流而終又按府君孫主簿益祚碑
曰府君幼時再從叔父石礪公云伋相之曰吾宗之
福盡歸于汝后裔果繁顯云今我趙散處于京鄉者
可以千數名位著者又磊落相望皆府君後也石礪
公之言信矣意者府君有潛德篤行不享于厥躬以
遺子孫而然歟墓舊有表無陰記諸宗合議以可徵

之蹟樹諸碣不敢用衍語者謹之也

外王考南原府使 贈吏曹參判洪公墓碣

仲舅薌菴公嘗謂我先人曰吾先子葬久矣墓無刻子其文之在男惟我在甥惟子在耳匪子不足徵也未幾薌菴公歿先人且未遑焉外氏諸人懼其愈久而愈泯復屬之寅永寅永我父母末育也曷敢曰得公萬一哉雖然我先人侑之文曰雅儀之真仁言之溫曰外不崖俗心與世涼公之季參判公益弼亦曰公輔之器世人所許是可以詔諸後公諱益彬字君質洪氏籍唐城上祖諱殷悅佐麗祖官太師我朝有

諱聖民策兩勲典文衡諡文貞文貞之孫忠烈公諱命考以關西伯殉丁丑虜難寔公五世祖也高祖諱重普右議政忠翼公會祖諱得禹江原觀察使祖諱致中領議政忠簡公考諱濟猷參奉 贈吏參妣贈貞夫人恩津宋氏牧使炳翼女同春先生之曾孫公以 肅宗己丑生生而炯朗暗室有輝宋公常以照夜璧稱之十三而孤毀踰成人既冠恢弘有識度時忠簡公位甸軸公以冢孫晨昏承佐囊篋咸宜而尤謙謹座無私客逮持重守鄉廬專意經籍若將終身癸亥授寢郎不就明年除翊衛司侍直 上念忠

簡公貞蓋賜公對勉以趾美蓋異渥也屢遷衛率先
是有權奸之求媾者鄙而斥之及考蔭講也故屈之
遂自引遞一世譁然庚午敘拜司僕寺判官出爲瑞
興縣監三載陞守陝川郡歲餘辭遞又明年由司導
寺僉正移載寧郡守繕軍械有璽書褒丁丑棄歸間
歷諸司久之除南原府使乙酉崔益男以籌郎閱庫
庫有錯其名者因搆而實之上曰誠然也故相家
也當倍律配南海旋燭其誣特宥還丁亥拜漢城府
判官是年十一月一日考終于第享年五十九葬于
仁川臥牛坪與夫人同塋夫人杞溪俞氏領議政文

翼公拓基女先公十八年卒後用仲胤貴公 贈吏
曹參判夫人 贈貞夫人夫人孝友端潔事夫子無
違家甚窶或憫之爲之謀捷徑夫人正色曰不義而
祿寧餓耳且夫子豈利屈者哉聞者悚然舉三男三
女男長相胤次相纘改秉纘文參判次相憲進士女
長適閔弘烈次適牧使徐簡修次適判敦寧趙鎮寬
卽我先人也相胤早幼有一男元燮蔭參議秉纘繼
男履燮縣監女進士李文淵側室男應燮武科女趙
養和相憲亦早幼無後元燮四男顯圭集圭牧使勝
圭校理穉圭副率女沈宜輔側室女徐有說履燮三

男世圭明圭永圭教官鍾遠進士鍾浩顯圭出也洗
馬鍾英鍾茂鍾華生員鍾薰集圭出也鍾應鍾序勝
圭出也鍾馨穉圭出也五世而最長孫淳敬也長女
繼男閔致三次女不育季女三男參判趙萬永牧使
原永參議寅永萬永女今 王世子嬪也公頥而皙
眉眼疎秀不飭而自整性和厚內行甚篤宋夫人高
年多疾視且瞿公與季氏躬將其起居迭誦古書以
娛之夜不解衣者數十年屢縮郡紱未嘗爲產業計
喜施與恤貧窮歸之者如家有與鄰倅親者乞婚資
不得過公邑公素無分慨然辦粧匱費厚贈之其人

後以醫名每公家有疾病至老殫誠曰吾敢忘洪公
也自南原歸簿餘過千金悉舉以防紙瘼其爲政也
專務寬恕或有罪當拷訊掩戶而不能見吏民化之
竊嘗聞公仲婦之庶弟之妻讎其女公詛之于公家
家人欲發之公曰其家將有以處之發之當法之吾
不忍也人以爲盛德云嗚呼公自少偉然有廊廟望
而顧沉屈蔭路未克展施然宗族士友之論咸曰仁
人哉夫仁人者其後必昌小子是以知外氏之福慶
未艾也

仲氏羅州牧使 贈吏曹參判府君墓碣銘

序并

府君諱原永字喆卿我季父繼後子而寅永之仲兄也始季父二十而夭無嗣越四年府君生我先人抱襁褓乞我季母鞠之季母性端嚴有規度抱負疾恒在床茲間然府君自孩提時已不離左右至誠服事俾季母懽然自忘其非已出者蓋二十有四年季母既歿奉季父柩合祔于原州王考塋內旋以宅兆不利營新緬未克就者二十有六年府君病臨歿諄諄如夢中語惟此事然又以府君權厝於揚州之白石者十有五年我嫂氏繼歿始占地於抱川防築洞負坎之原葬府君與嫂氏其上穴遷季父季母墓而下

穴乃府君之亡子婦金氏窆也幽室冥漠雖不可議思一岡三墳骨肉聚焉尙可曰卒成府君之志也歟慟矣哉我趙籍豐壤肇祖乎高麗侍中諱孟本朝之始顯者爲漢平君恭肅公諱益貞八傳爲 贈上相諡景獻諱尙綱卽府君曾王考王考諱曦 贈貳相諡文翼考諱鎮宜通德郎 贈吏曹參議妣 贈淑夫人清風金氏吏曹參判光默女本生考諱鎮寬 贈上相諡孝文自景獻以下三世皆官冢宰妣 贈貞敬夫人南陽洪氏府使 贈吏曹參判益彬女配淑人清州韓氏領議政翼貞公用龜女 正宗三年

雲石遺稿 卷十二
已亥生終以周甲之月正己未寔 當寧五年也男
秉駿文科今參判推是恩府君 贈吏曹參判淑人
贈貞夫人女適李峻進士元世貞洪祐昌秉駿子男
並幼府君生於 正宗元年丁酉 純宗二十五年
乙酉二月丙戌卒葬用本年四月之乙丑享年四十
九其以進士小成在癸亥以童蒙教官筮仕在庚午
凡歷內職者六外職者五而羅州牧使其末職也此
府君系闕踐履之大畧也府君溫而貞簡而有則自
守也潔而於人也恕不與物競不與命爭而內截然
人莫敢相干其少也以奕世宰相子閉門保拙無然

諾之交冠劍之飾蕭閒如寒士及寅永釋褐繼而伯
氏忠敬公諱萬永託肺腑親府君亦通籍禁中自是
益加恐懼平居必淨掃端坐絕戶外屢仍謝場屋事
不赴生平知舊多顯颺者而府君獨棲遲蔭塗不以
是介諸懷爲郡邑待上官必以禮曰吾恥其以我爲
有挾而簡之也撫羣吏必以恩曰彼獨非吾民人乎
安用箠撻爲也至守職奉公處曰非我之自勉曷責
乎人故勘糶糶供銓總率爲列邑先而閭閻細民終
無疾痛愁怨者此府君爲治之實績而其還也僮無
添指田不增畝雖素號廉白者有所不及是固素性

雲石遺稿 卷十二
卽然亦足推律身之以清苦也夫自府君之歿二十
有餘年凡覲德慕義之人語到輒涕愈久而不能忘
我由是知我府君誠於中者篤而形於外者博也况
韓夫人事舅姑以孝事夫子無違言古所云女士者
殆近之非我言也皆我族戚男婦之言也銘曰
夫何培之厚而嗇位與壽名聲不施於後其或不食
者有諸

雲石遺稿卷之十二

